

ASO GAFUA, 27 IUNI 2022

Na toe faaauau Taulumaga a le Fono Aoaofaitulafono i le itula e 6:00 i le afiafi.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.2) 2021/2022 & Tulafono Tau Faaofi o le Faatatauina o Tupe 2022/2023.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofaitulafono.

E faataatiaese a tatou Taulumaga i le itula e 1:00 i le aoauli o lo o saunoa le Minisita o Aoga, Taaloga ma Aganuu. O le mea lea ou te tapa ma le faaaloalo lau Afioga e te tulai mai mo le faaauauina o lau saunoaga.

Afioga Hon SEUULA IOANE: Faafetai i lau Afioga i le Fofoga Fetalai. Ua faliu nei le la i lona tauafiafi, le la o Samoa ua felanulanuai, ua felanuai ona ave i le lagi, aue ta fia savalivali. Lau Afioga i le Fofoga Fetalai, e momoli le faafetai ma le faamalo i lenei vaega o le afiafi, e talitonu le agaga ua maua se faasiligamalosi i nai itula ua mavae sa faataatiaese ai Taulumaga o le Fono Aoaofaitulafono a le Malo o Samoa. Ae faafetai i le Atua o lea foi ua tatou toe feiloai i magafetau ola i le alofa ma le agalelei o le Alii. E le o toe tele se taimi ou te tulai atu ai lau Afioga i le Fofoga Fetalai, ua na o nai vaega itiiti ia na totoe, o lea o le a faauma atu.

E tapunia le Fono analeila ua ou sauni ou te tautala i le \$2 miliona pei foi ona fesiligia e le Laulau-a-Fono. O le tausaga lea na tea nei i le Tala Faaletupe o le 2021/2022, e \$1 miliona na faaagaaga mo le vaega lea.

Afioga Leana Ronnie Posini: Lau Afioga i le Fofoga Fetalai...

FOFOGA FETALAI: Ia, malie lau Afioga i le Minisita se i tulai mai le sui usufono o Safata 1, o le a le mataupu lea o le a...

Afioga Leana Ronnie Posini: Faafetai tele i lau Afioga i le Fofoga Fetalai, ae ona o lea e matau atu o lea ua see le Afioga i le Minisita ma le tatou Iunivesite o Samoa, a o lea foi sa i ai se manatu o lenei itumalo sa faali

ai i le tulaga lea o polokalame ia faa-Matata Eseeese. I lau matau ma asiasi foi i uta i le aoga, ua siitia lava le aofai o tamaiti e resitala i polokalame ia. O polokalame foi ia lau Afioga e ese le taugata aua e i ai mea e faatau mai e faatino ai a latou aoaoga ina ia vave ona malamalama ma atamamai alo ma fanau a le tatou atunuu, a o lea lava ou te matau i le Tala o le Tupe, o lea lava e pei e tau faaitiitia i lalo le Tala o le Tupe pe tumau foi. O le fesili la o lea ou te faafesili ai i lau Afioga foi lele, o lau matau i le toatele lea o tamaiti, e le gafatia le tupe lea ua toe tuu foi i ai i lau lea matau, e 6 i le 7 masina ua uma le tupe lea e faamoemoe e ave i ai e fai ai a latou aoaoga, a o le isi 4 i le 5 masina, o lona uiga na o le usu fua lava o tamaiti i le aoga, ae ua leai ni mea e faatino ai latou aoaoga. Ia ma le agaga faaaloalo.

FOFOGA FETALAI: Ia, lau Afioga i le Minisita.

Afioga Hon SEUULA IOANE: Faafetai i lau Afioga mo le avanoa, faafetai foi i le sui usufono mo le faanatu mai o ia itu. O le a ou toe foi la i tua i le Iunivesite, ona o nisi foi vaega ia ua taua e le sui usufono. E moni ma faamaoni, o le agaga autu lena o le polokalame a le Iunivesite aemaise o le APTC ua soofaatasi i laua ina ia tapena polokalame e faaoa ai tamaiti aoga ina ia iu mai le aoga Iunivesite e o atu i tua e faiaoga ma maua ni galuega ua i ai ni avanoa e tapenaina ai lo latou soifua e ala i galuega.

O le itu lea o lo o popole i ai le sui usufono, o le tapenaga foi lea e faatali mai ai tamaiti e o atu, aemaise o le faatauina o alagaoa e faatino ai galuega lea. E moni ma faamaoni mo le taimi nei ma le amataga mai lava e le i leva tele ona faaofi i totonu o polokalame a le Iunivesite tatou TVET ma tatou BISET ona ua tilofia foi e le Pulega le aoga foi o lea polokalame mo tatou tamaiti aoga. O le taimi nei, o lo o faifaimalie lava ma faatau nai vaega e fetau ma seleni o lo o mafai ona faamatu atu a le Malo mo le faatinoina o polokalame. E i ai le talitonuga e le muta i i, e faaauau pea le faatinoga o nei alagaoa seia oo lava ina taunuu i se taunuuga mautu. Pei o se tali atu lea i lau Afioga.

FOFOGA FETALAI: Ia malo faafetai, atonu o lea ua manino le sui usufono mamalu. Se i tulai mai lau Afioga i le sui usufono mamalu.

Afioga Leana Ronnie Posini: Faafetai tele lava i lau Afioga i le Minisita e ala atu i le Fofoga Fetalai. E leai, o au polokalame ia a le TVET lau Afioga ua matua leva aoaoga ia a le Matata Eseeese na amata mai lava i le 1963, ia lea na tuufaatasi i le 2006 ma le Iunivesite, e le fou la polokalame ia faa-Matata Eseeese. O le ala lea o lou tau apaapa atu ona e i ai foi si ou iloa laititi foi lea, o le taugata ia, ae pei o lea ua taua o lea ua tau ave i ai nai tupe e fai ai, e leai ua leva le tatou vaega lea o le aoga a le Matata Eseeese. Ma le agaga faaaloalo.

FOFOGA FETALAI: Ia, ou te iloa o la e ua saunoa mai le Minisita i le tulaga o i ai i lenei taimi, atonu o lo o fuafua mamao aua le agai i luma. Ia, saunoa mai lau Afioga i le Minisita.

Afioga Hon SEUULA IOANE: Faafetai i lau Afioga i le Fofoga Fetalai. E sao lelei lava le finagalo o le sui usufono, e le o se polokalame e fou nei le polokalame lea, peitai, e faaofi mai le Faigamalo lenei ua leva ona i ai le polokalame, ae le o lava ni faatinoga o fuafuaga. E i ai foi la le talitonuga, e leai se malosi tele e oso atu ai i le Plan A oo i le Plan D po o le F, e tatau lava ona faifaimalie atu i le mea lea e taatia ai i le taimi nei. E le mafai ona siitia tele, e o atu lava o mea o la ua taatia ai, o i ina e amata ai ona faufau le gaoioiga fou. Ia pei o le ala lea a faafofoga mai foi le sui usufono i lea itu, ia o le fuafuaga lena o lea e taatia ai nei ona e tilotilo foi i le tamaoiga o si o tatou atunuu, e le faapea o le a ave foi le faamamafa i lea itu ae taatia le academic e tatau ona faamuamua i le pulega a le tatou Iunivesite. E pei o se faamaninoga atili lea i lau Afioga.

O le \$2 miliona lea ua faataatia nei, e pei ona ou taua i se taimi ua sola i le tausaga faaletupe na tea nei, e \$1 miliona na faaagaaga mo le vaega lea tau taaloga, ae i ai lava ma isi vaega na aafia mai ai tupe na ave mo asosi taaalo sa i ai i totonu i lalo o le vaegatupe lea. E 5 asosi taalo sa faatupeina i le \$1 miliona lea, ae ua matauina e le Matagaluega o Aoga, Taaloga ma Aganuu, e 28 asosi taaalo o lea e i totonu o le tatou atunuu. Ma ua i ai le fuafuaga a faamanuiaina le tala o le \$2 miliona lenei ma pasia le tupe, e ono aofia le 28 taaalo e faatinoina i lalo o ana fuafuaga ma ana polokalame alualumamao. A outou silasila ane i le Tala o le tatou Tupe, e i ai vaega na e blank, e le o mafai ona faatino mai i ina. O lona uiga, o le fuafuaga ina ia faasoa i ai le \$2 miliona lea ina ia galue lava e pei lava o le mea na masani ai, ae ua faaitiitia le tele o fuafuaga fai.

O le taimi lenei, ua tapena le Matagaluega e faataatia ana fuafuaga ina ia pasia loa lenei faamoemoe....

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai pe maua se avanoa faamolemole...

FOFOGA FETALAI: Ia, malie lau Afioga i le Minisita se i tuu atu le avanoa i le sui usufono o Anoamaa 2, le Taitai o le Itu Agai.

Tofa Hon Lauofo Fonotoe Nuafesili Pierre Lauofo: E pei o le tasi lea mataupu sa afea i lau lauga faalauaitete lau Afioga, ona o lea ua aveese mai tupe ia i lalo o taaloga i le vaegatupe lea a lau Matagaluega, a o lea ua faasee atu i le isi Matagaluega. E pei o le mafuaaga lea na ou fesili ai, ona e pei o lea sa sosolo le faasoa i luga o Faalapotopotoga tau Taaloga o la e resitala i le SASNOC. Masalo e maua le 50 o Faalapotopotoga, ae masalo pe na o le

30 Faalapotopotoga la e o lo o totogi pea a latou subscriptions po o membership fee foi lea faaletausaga. O lea la sa aumai i le Tala Faatatau o Tupe, o lo o faapena ona faailoa mai lava le igoa o lea Faalapotopotoga ma lea Faalapotopotoga o le a oo i ai le faaso. E le gata i i e pei foi ona saunoa le Minisita o le Pulega foi lea o Petipetiga ma le SIFA, aua o le SIFA foi lea e maua ai isi vaegatupe e fesoasoani i taaloga. Ia a o lea e matauina lava i tausaga uma e le taitai lava ona e tele lava le manao, e tele ia taaloga ma mea e fai. A o le tulaga lea sa ou fesiligia ai ona o lea la ua aveese, a o lea lava sa mautinoa Faalapotopotoga ia na o Faalapotopotoga resitalaina i le SASNOC, latou ia. O i ina la, e pei o le vaega lena pei o ni faamalu foi ia o isi foi tamai Faalapotopotoga i lalo, o i latou na e member ai i mea o Faalapotopotoga i le tulaga lea. E moni ua sii mai le \$1 miliona i le \$2 miliona, ae tele lava isi fesoasoani o lo o manaomia ona e le taitai lava le vaegatupe lea. O lea la ua see i le isi Matagaluega, o lea la ou te le iloa po o le a le faiga o le faaso lea o le a fai ai.

E pei o le tulaga lea lau Afioga i le Minisita.

FOFOGA FETALAI: Se i tulai mai lau Afioga i le Minisita. E pei lava ua uma ea ona e tali i le mea lea analeila. Ia saunoa maia e faamalamalama atili.

Afioga Hon SEUULA IOANE: Faafetai lava i lau Afioga. Faafetai i le Afioga i le Sui Taitai o le Itu Agai mo le fesoasoani mai foi i le tala o le seleni a le Matagaluega o Aoga, Taaloga ma Aganuu. E moni lava lana saunoaga i le fotuai mai o le Pulega fou, ua matou vaavaai i ai i i lava i lalo o le polokalame a le SASNOC, ua na o taaloga lava e tapena faa olimipeka mo taaloga i fafo, a o taaloga i totonu lava o le tatou atunuu, o lea lava e fetamoeai asosi ia, a o atu i le SASNOC omai i i, o i o omai i i. Peitai la, ua matauina ma le totoa e le Matagaluega, o se avanoa lelei lea o le a faataatia ai ni strategy ina ia mafai ai ona maua se ano e tasi e tuu uma i ai taaloga ia ma faamanino foi a latou tala o le tupe ma lipoti ina ia mafai ona anoa le faaaogaina o seleni nei o le a faasoaso. Peitai, o lea na o se tala lautele ona o le Tala o le Tupe lea e le i pasia, a ua tapena le Matagaluega ma asosi taaalo ia e faia foi se talanoaga ma foufou e feiloai aua le posiposiina o lenei seleni ua taatia mai mo le Matagaluega ma asosi taaalo. O le faamaninoga lena o ia itu ae faafetai tele lava mo le fesoasoani mai, ou te manatu o le a poupou ai foi ma maua ni lagona mo le faaaogaina tatau o ia tupe a le tatou Matagaluega.

Ona ou oo mai lea i le vaega mulimuli lea lau Afioga i le Fofoga Fetalai, o le Ofisa o Aoga, le Matagaluega o Aoga i lalo foi o ana ia fuafuaga, o lo o i ai le Komisi e tau o le Komisi o le Gagana Samoa. E tele foi taimi o ia tamalii o lo o tauave i le faataunuaina o lea faamoemoe. O le Komisi lea o lo o taumafai e apoapo le tatou gagana ina ia tulaga pea i le tulaga o se Gagana

Samoa. E le gata i le faaaloalo, a o le vatapuia o tagata taitoatasi. O le mea lea lau Afioga i le Fofoga Fetalai, e taua i lou manatu se tasi o sui usufono sa afea i sana saunoaga le itu o le gagana ua soona felafoai i luga o upega tafailagi. Paga lea, o le gagana, e i ai lona faasinomaga, e i ai lona tuaoi. Po o le a lava le tagata, po o le a lava le ituaiga siosiomaga e i ai le tagata, a tautala pe saunoa, e i ai le mea e gata ai lana tautala, e i ai tu faaaloalo ma tu e tatau ona afea i le va faa-tuagane i le tuafafine, tuafafine i le tuagane, le va o fanau ma matua, le va o matua ma fanau. Ae paga lea lau Afioga i le Fofoga Fetalai, e faanoanoa lava i le vaavaai atu i luga o tatou upega tafailagi ua matuai palu faasapasui e tagata le gagana e mimita ai le Samoa.

Lau Afioga i le Fofoga Fetalai, e i ai le faaupuga a se tasi tagata na ou faalogo ai e faapea, learn to be content, learn to be content. Afai e fai le tatou taugapu i le faguvai tulou, ua lava a le faguvai tatou te misa ai, tapuni o le faguvai, le lanu o le faguvai, po o fea e aumai ai le faguvai, a o le a le aoga o le faguvai. Peitai lau Afioga, ua ese nei aso. E ese lava le faaupuga e momoli mai e le isi tagata, ae ta te vaai atu i le tali atu a le isi tagata, oka, e matautia. Talofa e, ailoga o manatua e nei tagata o la e faitau ai latou alo ma fanau, ae a matua, ae a le aiga Sa Levi, o le latou matafaioi lea o le tausii o le tatou vatapuia, a o lea lava e ese uiga ma faiga i nei onapo.

Lau Afioga i le Fofoga Fetalai, ou te le tusi lou lima i lenei Palemene, ou te manao e faailoa atu i tagata o lo o faalogologo mai i le taimi lenei, faamolemole, se i tau faamama le sausau, o lele e afifio tupu ma tamalii, o lea e ee aiga, ae a le faafaleupoluga o e faia upu o le tatou aganuu? Se i faamolemole se i tagai ane i ia itu. Ona faapea lea o se faamatalaga lau Afioga i le Fofoga Fetalai ne i umi naua, o le sala ulua le sala a le tagata...

Afioga Niuava Eti L. Malolo (Vaisigano 1): Lau Afioga i le Fofoga Fetalai pe maua se avanoa...

FOFOGA FETALAI: Ia, malie lau Afioga i le Minisita se i tuu atu le avanoa i o i Sagaga 2. Ia tulai mai Tuisamau. Sa taua i lau lauga le mataupu lena e te saunoa mai ai?

Susuga Maulolo Tavita Amosa: O lea ou te manatua na o au lava lea sa afea le mataupu lea. Faafetai lava. Faafetai tele lava i lau Afioga i le Minisita o Aoga i le tulaga lea ua afea ai le tatou gagana i luga o upega fesootai internet ma upega tafailagi website. Na o le pau lava le mea sa taumafai atu ai, na o sina laa tasi lava teisi i luma e fesoasoani i le faafitauli lea ua e saunoa i ai, e manatu tatou te ioe ma amene uma i ai, tulaga faanoanoa tainane se tulaga faavauvau i le gagana Samoa. Pau lava le mea lea e toe tuu atu lava i tafatafa, o se avanoa e faaaoaga ai e le Matagaluega o Aoga ia tatou upega fesootai ma upega tafailagi e faatino ai ni polokalame faale-aoaoga. O le mea lena lea sa ou taua a. O le uiga o le faamatalaga, ina ia amata ona

tuu ane i le fatu o le tamaitiiti, o le internet ma le website e mafai ona faaoga ma le popoi ma le faaaloalo e fai ai a tatou aoaoga, i avea ma nofoaga e amanaia ma faaaloologia ai upega fesootai ma upega tafailagi, e fai ai a tatou aoaoga e iloa ai le vatapuia, ae ua le na o se nofoaga tatou te faaali ai le maemae ma le tauimasui ma le taufaaleaga, se i tulou. Pei na pau lava na o si mea pe mafai ona toe faaopoopo ane lava i ai, ae faafetai tele lava mo lea tulaga lau Afioga.

FOFOGA FETALAI: Ia mo le faasaoina o le taimi o lau Afioga, tulai mai le sui usufono mo Vaisigano 1.

Afioga Niuava Eti L. Malolo: Mo le faasaoina o le taimi o le Afioga i le Minisita, ia pei o le tasi foi lea o vaega sa faaiu i ai le lauga a lenei foi itumalo. E ese foi la le ankle na ou agai atu ai lau ia tuualalo. Ae ua ou matauina i luga o se tasi foi o nusipepa, na manaia lava le talatalaga, ae pei o le mea la ua aumai, o le target na ou agai i ai o totonu o le Palemene, ma lau tala lea sa fai, e afua mai mauga manuia o le nuu. O fea o i ai mauga tetele? O totonu o le Palemene lenei. E muliai o tatou fesili ma faafilemu le atunuu, a ia filemu tatou o Taitai o le atunuu. E leai se mea tatou te mafai ona fai atu i le atunuu, ia outou ffilemu, ae le o ffilemu mauga tetele o le atunuu. Leaga a tetele ona lolovaia lea o laufanua mauualalalo. Ae pei o le agaga lena na ala ai ona avatu, o le manumanu i le gagana. O lea e matau atu, ia, o i latou uma sa i totonu o le galuega faafaioga lea e talanoa i le mataupu lenei, leaga o le tuumumusu lea sa fai ai le aoga, o le vafealoai. Ae afai e solomua i Taitai o le atunuu le gagana vale, tulou, ia o le a la le mea o le a maua ai le filemu o le atunuu? E i ai le upu foi lea e fai i le auro, seiloga lava e tuu i le afi ona faatoa iloa lea o le auro maoli. Ia a ua tele foi auro ua tuu i le afi, ua tatou vaai i le auro, peitai tatou te le talitonu o le auro maoli lea. Aisea? Ona ua see ese lo tatou faatuatuaga i le Atua.

Ae pei o le agaga lena lau Afioga i le Fofoga Fetalai, o totonu iinei i le Palemene, Taitai o le atunuu e afua ai le filemu o le atunuu lenei. Ma lou faaaloalo tele.

FOFOGA FETALAI: Ia, o lea ua maua le saunoaga a le sui usufono. Ia, ou te iloa o lea ua faafogafoga mai le Afioga i le Minisita, ia e tau popoe foi le Nofoa i se isi tulaga o le tuuaiga faitele i totonu o le Palemene e sui usufono mamalu. E manatu lava o lo o saunoa manino lava le Minisita i tulaga o mea o lo o afaina ai le lautele, le vaaiga lautele. Ae pei o le itu lena o lea e popoe ai le Nofoa. Se i saunoa mai lau Afioga i le Minisita po o le a sou finagalo.

Afioga Hon SEUULA IOANE: Faafetai i lau Afioga i le Fofoga Fetalai, ou te faafetai foi i sui usufono mo le lagolagoina o lenei mataupu. Ou te

talitonu, o le matou lauga lava lea ua fesoasoani mai e faauma. Ia, o lea o le a ou mei ese ma le itu lea.

Lau Afioga i le Fofoga Fetalai, o le sala ulua le sala a le tagata e lauga ae le pai i mamalu o le atunuu. O le taimi ua sola, sa ou muai manatu faapea, faamuamua ia mea i Matautusa aua lo tatou faavae ma le Atua, a o le taimi lenei, se i ou pai i si o tatou atunuu e faigata le tapuaiga.

E faapea le tala, o le itu lea i sasae i Manua e i ai le taisamasama ma le lautaamu na tafea, e afua mai i ina seia paia le lualoto o alii o lo o i le fale Alataua, o la e ola ai le laau e tau o le puataupea, pau lava lena o le nofoaga o Samoa e ola ai, o Samoa lena. Aua foi o Samoa o le atunuu ua uma ona tofi. Po o fea lava le mea e fealuai ai le tagata, ua uma ona maioio tulaga ma mea uma e i ai. E pei lava foi o le uliuli o le moana o le sami, na ona uliuli lava ae iloga lava ala o i'a feai. E faapena foi le feteitei o puao o le lagi ma puaotoa. Na ona faapela lava ae iloga lava fetu e taia ala o faigamalaga. E faapena foi le tatou atunuu, ne i le afea ma le a'u i sau faamatalaga, ae ou te manatu, ou te fia faatalofa i le Afioga i Le Ao o le Malo, lau Afioga Tuimalealiifano ma le Masiofo, e te alaala lava oe i Matanonofa ma e silasila, e faigata o oe o le Tuiaana. Ou te fia ane foi e faatalofa i le Sui o le Fono a Sui Tofia, lau Afioga Le Mamea aemaise o lou faletua. Faamalo le galulue, malo le tauatai, malo le tapuai. O faiva lava e tapuaia, o faiva na e iu manuia.

Ia, e le galo ia te au le vasega o Sa Levi, e ui lava i se taimi ua sola sa afea i se faamatalaga, ae faamatietie lava i luga le galuega faitaulaga a faifeau, lo latou faafaletuluia i alaafaga ma afioaga ona o le fai ma sui o le Atua e momoli mai le feau o le faamafanafana ma faalototele si o tatou atunuu i mea e tutupu i lea aso ma lea aso.

Ae a le pulega a Pule ma Tumua Ituaui ma Alataua, Aiga i le Tai ma le Vaa o Fonoti? O Samoa ua ao. E i ai le talitonuga, o nai o tatou tagata o lo o nofo mamao mai atunuu mamao ma susue lo latou faamalama e vaavaai mai ma faalogologo mai ma aumai so latou sao i si o tatou atunuu, ou te momoli le faafetai tele mo la latou tautua. Ia faamanuia le Atua ia te outou aemaise o tiute ma tofi o lo o outou galulue ai.

Lau Afioga i le Fofoga Fetalai, se i ou oo e fai sau tala i si ou itumalo. O au foi ou te le manao e fai tele se tala i lou itumalo, aua ou te tu loa i luga e iloa uma lava e lenei Fale Fono, Alataua Sisifo. O lona uiga, e le tau faamatietieina si nei itumalo. Ae ui i lea, afio ia lau Afioga i le Nofoafaalupega i le afio o Aiga ma Tapaau, tainane foi le Matua ia Tauiliili ma le Aiga Samoeleoi, ia faapena foi le Tama a le Malo ma le Usoalii, Seuula ma Aiolupotea ma alo o Lilomaiava. Tootoouli o si ou itumalo, le Fetalai ia Taatiti ma Tuaiaufai, aemaise o lau Fetalai Folasaga o oe o le Fofoga o Papa. Lau Tofa Momoemausu ia ma upu i le tatou Fale Alataua. O le tatou Fale Alataua, e i ai le mea foi lele i le taimi o taua a Tuna ma Fata, e nana i

lalo o le oneone le aupega ae fealuai i luga, faatoa migoi lava i le taimi e fai ai le taua. Malo le tapuai, faafetai le lagolago mai i le tatou itumalo.

Ona ou oo mai ai lea i le Afioga ia Aliimalemanu, e le o po se lilo i lenei Maota i le ma nonofo ai ma le Afioga i le Aifaoga. O au o le sui usufono o le itumalo, o le Afioga ia Aliimalemanu ou te taua foi o le sui usufono o le itumalo. I lo maua va fealoaloi ma le va lelei faale-itumalo, ou te faapea atu ai, lau Afioga Aliimalemanu, afio mai tatou galulue faatasi. E leai ma se mea e maua i lo tatou feeseeseai, ae a tatou piilima faatasi ma galulue, ona aliali lea o le Atua lea tatou te auauna i ai.

Lau Afioga i le Fofoga Fetalai, ua uma i i se manatu o lenei itupa. O le tatalo, ia maua pea e lau Afioga se toamalie mai le Atua aua le faafoeina o lenei Fonotaga.

Lau Afioga i le Sui Palemia ma lou auvaa, le afifio o Sui Minisita, lau Afioga i le Taitai o le Itu Agai ma lena Itu o le tatou Malu, faamalo fai o le faiva. E i ai le talitonuga, na ona tatou feeseeseai lava i o tatou lagona ma tatou faigaupu, ae tasi lava le auga ma le tatou faamoemoe, ia manuia le tatou atunuu. Soifua ma ia manuia.

FOFOGA FETALAI: Ua faamalo faafetai le tofa i lau Afioga i le Minisita o Aoga, faapea foi Taaloga ma Aganuu, aemaise foi le tatou Iunivesite. Faafetai o lea ua folasia foi nisi o mataupu sa laga e sui usufono mamalu o le Maota, malo foi le saunoa faatamalii ia ma nai feau foi faale-Tusi Paia ua mulimuli mai. Malo lava faafetai tapena. E talitonu foi ua faamalieina foi finagalo o sui usufono sa laga nisi o mataupu taua aua foi le Matagaluega o lo o faafeagai ma lau Afioga. O le mea lea, malo lava faafetai, malo galue. Faafetai foi i le Matagaluega o Aoga ma le Iunivesite aua foi le tatou atunuu ma tulaga tau aoaoga aua alo ma fanau a le atunuu. O le mea lea, malo faafetai malo saunoa.

Ia, ou te iloa o lea ua oo mai le faasologa o tatou Minisita i lau Afioga i le Minisita o Faamasinoga ma Pulega tau Faamasinoga. Ia, tulai mai lau Afioga i le Minisita.

Tofa Hon MATAMUA SEUMANU VASATI SILI PULUFANA (Minisita o Faamasinoga ma Pulega tau Faamasinoga): Faafetai i lau Afioga i le Fofoga Fetalai. Ia o lea ua oo mai le faasologa o le talifuaitau a le Malo i lenei Matagaluega. Faafetai mo lenei avanoa faaauro ou te tulai atu ai e fai ma sui o le Matagaluega o Faamasinoga ma Mataupu tau Faamasinoga se i tali atu ai i nisi o mataupu sa laga e sui usufono mamalu o le Palemene, e faatatau i le Tala Faatatau Autu o le Tupe 2022/2023.

Lau Afioga i le Fofoga Fetalai, a o le i agai se leo o lenei Matagaluega i mataupu sa laga i lenei Maota. Ou te muamua lava ona ou faapai atu i le tapuaiga a Samoa aoao, faapea si ou itumalo o Faasaleleaga 1.

O Samoa o le vaofilifili, o le fue lavelave, o le ia e iviivia e leai se toe aliali pe fia lagona, aua o Samoa o le atunuu e aomamala, o le atunuu tofi. E talataua Toga ae talatofi Samoa.

Lau Afioga i le Fofoga Fetalai, ou te muai faatulou atu, i le maualuga o lenei Maota. I le afio o lau Afioga i le Fofoga Fetalai, afio lau Afioga i le Sui Palemia, afifio a outou afioga i alii ma tamaitai Minisita o le Kapeneta. Afio lau Afioga i le Sui Taitai o le Itu Agai, afifio foi a outou Afioga i sui usufono mamalu o le Palemene.

E faatalofa atu i Ofisa Sili o Pulega o Matagaluega ma Faalapotopotoga Tumaoti a lo tatou Malo. Lau susuga i le Failautusi ma le Ofisa o le Fono Aoaofaitulafono, le mamalu o Matagaluega eseese a le Malo o lo o feagai ma le tautuaina o le Fonousu a Samoa.

E faatulou atu ma faatalofa i le tapuaiga a Lau Afioga i Le Ao Mamalu o le Malo ma lau Masiofo. Lau Afioga i le Sui o le Fono a Sui Tofia ma lou faletua. Faatulou atu i lau Afioga i le Faamasino Sili, le Peresetene ma le mamalu o alii ma tamaitai o le Faamasinoga.

E faatulou atu i le paia i Aiga ma a latou Tama, o Tama foi ma Aiga, le usoga Tumua ma Pule, Ituau ma Alataua, Aiga i le Tai ma le Vaa o Fonoti.

E faatulou atu foi i le tapuaiga a nai o tatou uso i Sasae, aua le Fagafulu ia Sua ma le Vaifanua, Fofu ma Aitulagi, Saole ma le Saleaamua ma le Launiu na Saelua. Afio le Laau na Amotasi, Faatuiotomoti ma le Tootoo ma le mamalu ia Manuatele. O paia na Samoa, ma ona mamalu sausaugata, e amata mai i le Matafanua seia paia le Siufanua, na tauilo ai manu o Malo.

E le faagaloina lau faatalofa i le tapuaiga tatalo a le aufaigaluega tofofi o le Talalelei, i so o se tovine ma so o se ekalesia, e le gata i Samoa nei a e faapea foi i atunuu e mamao.

E muliai lau faatalofa i le tapuaiga a si ou itumalo e pele i le loto o Faasaleleaga 1. I le afio o Tia ma Luamanuvae, Tinousi ma Sua, alalatai le mamalu o le Falefia ma le Falesalafai, o oe o le lologapule, e te lave i manino e toe lave i aava. Afio foi le Taufaasisina ma le alala i le matuatala, alalatai Ulu ma Lemaota ma le mamalu i le Toiloto. O paia na ma mamalu o si o ta itumalo.

E faatalofa atu i le tapuaiga a le aufaigaluega o le Talalelei i si ou itumalo. E ui lava ina ua u mai le tua o se tasi o auauna o le Talalelei, o se tasi o faifeau matua o lenei itumalo. Le susuga i le Taitaifono o le Komiti o Atinae o le Ekalesia Faalapotopotoga Kerisiano i Samoa, ona o le valaau paia a le Atua. Ia tatou loto tetele, tatou talia le finagalo tutasi o le Atua. Ia faamaise le Agaga o le Atua i le faletua ma le nofoaalo ua tuua, faapea le ekalesia ona o le malaga a le Taitai o le lafu mamoe. Ia pau se toa, ae toe tu se toa.

Faatalofa i le tapuaiga a matua tausi a si ou itumalo, o lo o po le fala ma tapuai i o tatou faiva, malo le tapuai faafetai tatalo. Ae a le tapuaiga a le itupa o tina, faletua ma tausi, saoa ma tamaitai, ma le malosi o le itumalo, seia

oo lava i tatou fanau. Ia tapuai maia, se i taumafai la outou auauna, aua le Fonousu a le Palemene.

E faatalofa atu foi i lau susuga i le Ofisa Sili ma le Pulega faapea le mamalu o le Matagaluega o Faamasinoga, faafetai malo lava le galulue.

Lau afioga i le Fofoga Fetalai, o le a se i ou taumafai e tali atu i nisi o mataupu sa laga mai e sui usufono mamalu o le Palemene ma afea ai lenei Matagaluega. (1) O le faagasologa o galuega a le Faamasinoga o Fanua ma Suafa. Ua le o po se lilo i le silafia i le mamalu o lenei Palemene aemaise o le faafofoga mai o Samoa i luitau, o lo o feagai ma galuega a le Faamasinoga o Fanua ma Suafa. I le gasegaseamalo o ana Tulafono, ma o lo o ua aofia ai le faatinoga o ana galuega. O le sailiga fofu i le Faamasinoga Mauuluga faapea ma le Palemene, e ala i lana Komiti Suesue Faapitoa, o lea ua taoto ai le faaiuga o le Faamasinoga Mauuluga, faapea foi ma le Lipoti a le Komiti Suesue Faapitoa ua maea ona pasia i luma o le Palemene nei. O toomaga ia o le Matagaluega, ua toe faaauau ai ana galuega e ui e le i taoto i sona atoatoa.

O le faaiuga a le Faamasinoga Mauuluga ua faataatitia mai ai vaega o le galuega e mafai ona faatinoina e Afioga i Faamasino. O isi galuega e taoto seia maea ona fai teuteuga talafeagai o le Tulafono o Faamasinoga Fanua ma Suafa 2020. E amanaia ma usitaia e le Faamasinoga o Fanua ma Suafa, le faaiuga a le Faamasinoga Mauuluga, o le alafua foi o ana galuega o lo o ua faagasolo i le taimi nei, o lo o ua limataitai lava i le faaiuga ua taoto.

Na toe amata faagasolo galuega a le Faamasinoga o Fanua ma Suafa, i le aso 19 o Me 2022. O lo o lilifa le galuega i Tuasivi ma Mulinuu nei, i mataupu na faamaite mai i lalo o le Tulafono o Fanua ma Suafa 1981, aemaise o le mataupu Toe Iloilo po o Apili, ma o lo o faasolo lava nei galuega e pei ona masani mai ai. E leai foi ni galuega o taofiofia, seia vagana mataupu o lo o aafia i le faaiuga o le Faamasinoga Mauuluga. (2) O ni suiga o lo o i ai nei, e faapea o vaega manaomia mo le resitalaina o suafa matai. O le manaomia ai o se pepa faamaonia, po o le pepa fanau mo le resitalaina o suafa matai. E le o se faiga fou, ae o se faiga tuai ua toe faamalositia nei, ona o ni faafitauli ua tulai mai i le sao ma le faatuatuaina o tatou faamaumauga. O faafitauli ua matauina e amata ai le eseese o igoa e faatumu ai pepa saofai, ma suafa i totonu o faamaumauga aloaia e pei o tusifolau ma pepa fanau. E tele ina faaaoga faapuupuuga o suafa po o igoa tauvalaau, pe eseese foi aso fanau. E taua tele le tutusa o faamaumauga a le Faamasinoga ma isi faamaumauga aloaia, ina ia faigofie ona fesootai ma faamaonia ai se tamalii po o se tamaitai, i taimi manomia, e pei o faiga palota, femalagaiga.

Afioga Peseta Vaifou Tevagaena (Faasaleleaga 5): Lau Afioga i le Minisita.

FOFOGA FETALAI: Ia malie lau Afioga i le Minisita se i tuu atu le avanoa i le sui usufono o Faasaleleaga 5, lea sa laga mea tau Apili. Lau afioga i le sui usufono mamalu...

Afioga Peseta Vaifou Tevagaena: E momoli le faafetai ma le faamalo i lau Afioga i le Tamaitai Minisita. E manatu o lena ua manino foi le tele o nisi o vaega lea sa avatu ai le talosaga a lou nei sui usufono, e momoli atu ai lau faafetai tele. Ae pei o le tulaga lava lea sa avatu ai lava lau faafesili, o tulaga o Apili ia ua faataatia, aemaise lava galuega tuua i le motu tele i Salafai. E pei foi ona ou taua o le tele o nei faamasinoga, ua uma ona totogi tupe e tuu mai i luma. Ae peitai ua faataatiaese e le Faamasinoga i le vaitaimi lenei, ona o se tulaga faapea se i i ai se aso. O le ala lea o lou faafesili atu i lau Afioga i le Minisita, ia o lea ua e saunoa mai, e leai se tulaga foi lea o taofia, pei o lea sa ou fesiligia ai le Ofisa o Faamasinoga i le vaiaso na tea nei, ae pei o le tali lena e pei ona tuuina mai, o lo o taofia uma faamasinoga, aemaise lava Faamasinoga Apili. E pei o le tulaga lea sa ou fia maua ai se faamalamalamaaga, po o Faamasinoga Apili mai taimi o le Tulafono o le 81, po o le faamasinoga o le 2020 lau Afioga. E pei o le vaega lea, o lea ua matautinoa, ua uma foi ona soalaupule e le Maota le tele foi o vaega. E pei o le agaga lea lau Afioga i le Fofoga Fetalai, sa fia maua ai se faamalamalamaaga.

FOFOGA FETALAI: Ua malo faafetai atonu o lea foi ua malamalama le sui usufono mamalu. Ia e le o taofia lava a tatou Apili, o lo o faaauau e pei ona saunoa le Minisita, e vagana lava nai tologa e pule lava le faamasinoga i latou tologa se i i ai se aso. Saunoa mai lau Afioga i le Minisita.

Tofa Hon MATAMUA SEUMANU VASATI SILI PULUFANA: Lau Afioga i le Fofoga Fetalai, o lea ua ou oo i le vaega 3. O tupe faaagaga mo le tumavaevaeina o le Faamasinoga.

Afioga Peseta Vaifou Tevagaena: Lau Afioga...

FOFOGA FETALAI: E i ai se isi mea o totoe...

Afioga Peseta Vaifou Tevagaena: E pei o le agaga lea, e toe faafesili lava i le Afioga i le Minisita, pe i ai lava se mafuaaga, aua o lea e saunoa mai le Minisita, o la lava e le o taofia, a o lea e pei ona maua, sa ou talanoa i le Ofisa o Faamasinoga i Tuasivi, a o le tali la e aumai, o lo o taofia Faamasinoga Apili e oo mai i le taimi nei. O le ala lea o lea ou te fesili ai i le Minisita, pe i ai se mafuaaga. Ma lou faaaloalo lava.

FOFOGA FETALAI: Ou te iloa o lea ua maea tali le Minisita e le o taofia Apili, e sao lau Afioga i le Minisita?

Tofa Hon MATAMUA SEUMANU VASATI SILI PULUFANA: Lau Afioga o le sao lena, ona o lea e maua mai e le Ofisa Tutotonu ma le Pule Sili i Mulinuu nei, o tali ia o lea e aumai. E faamalulu atu ai i le sui usufono, e le iloa pe ese se tagata sa e fesili i ai, ua ala ai ona sese mai foi lau tali. Ae o lea ua faamaonia mai e le Tamaitai Ofisa Sili, e leai lava ni mataupu o taofia. O le toatele foi o le mamalu o le atunuu, ua malilie e taatitia a latou mataupu, se i uma fuaga malie atu faaiuga e pei ona lotea i luga o le Laulau-a-Fono.

FOFOGA FETALAI: O lea ua malamalama le sui usufono mamalu, o lea e afio mai i i, le Resitala, e mafai lava ona faafesili foi pe a faapea e faamalamalama atili. Ia saunoa lau Afioga i le Minisita e faaauau lau saunoaga.

Tofa Hon MATAMUA SEUMANU VASATI SILI PULUFANA: Ona ou oo atu lea i le Vaega 3 sa fesiligia, o le tumavaevaeina o le Faamasinoga. O le galuega lena sa tuuina mai ai se vaegatupe o le tausaga faale-tupe lena 2021/2022, ma o lo o faagasolo pea galuega, tapenaina o le Matagaluega mo lena faamoemoe. O le taimi nei o lo o taoto le talosaga i le Magaluega o le Tupe, mo lena vaegatupe ina ia tuuina i teugatupe faasao, a o lo o tapena pea lona faaaogaina.

Lau Afioga i le Fofoga Fetalai, o se faamatalaga na i mataupu na aumai i finagalo o le Maota.

E faamalulu atu, e le atoa liu o vaa i se tautua a le Matagaluega, o le matou tatalo atu, tau ina ia vaatele i so outou finagalo.

Ia alofagia e le Atua lau Afioga i le Fofoga Fetalai, alofagia foi e le Atua ia lena Palemene, ae ou ola i le agalelei o le Atua. Soifua.

FOFOGA FETALAI: Ia malo, faafetai, malo i lau Afioga i le Minisita o Faamasinoga ma Pulega o Faamasinoga. E talitonu lava ua manino, faafetai foi i le Maota, aua o lea e maua atu i luga nei o le Nofoa, e na o le toatolu lava sui usufono na agai i la outou Matagaluega. O lea foi ua e faamatalaina le tulaga e ono faamalamalama ai finagalo o nei sui usufono e toatolu. O le mea lea, faafetai, malo le silasila totoa aemaise lena vaitau i le tatou Faamasinoga o Fanua ma Suafa. Ia faafetai foi i lau afioga ma le Resitala ma la outou Matagaluega, i le faatoatoaina foi o le atunuu, a o tatou i ai i se vaitau se i tau toe fetuutuunai ma ia toe taunuu le tatou faamasinoga i le tulaga e tataua ona i ai. O le mea lea, malo faafetai, malo galue.

O lea ua oo mai le tatou faasologa i le Minisita mo Tina ma Tamaitai, Atinae o Nuu ma Afioga ma Agafesootai, lau Afioga Leota.

Afioga Hon LEOTA LAKI LAMOSITELE (Minisita mo Tina ma Tamaitai, Atinae o Nuu ma Afioga ma Agafesootai): E faafetai mo le avanoa i lau Afioga i le Fofoga Fetalai. E faatalofa atu foi i le paia o le mamalu i le Palemene nei. I le paia o le Afioga i le Sui Palemia, faapea le Kapeneta, le mamalu o Minisita Lagolago, faapena lena Itu o le Maota i le Sui Taitai ma sui usufono o le tatou Palemene nei.

E faatalofa atu foi i lau susuga i le Failautusi o le Fono faapea le aufaigaluega, faapea foi Ofisa Sili o Pulega o Matagaluega ma Faalapopotoga Tumaoti a lo tatou Malo, o lo o tatou faatasi i lenei afiafi.

E talitonu ona o lea ua maea foi ona paepaeulufanua e nai ou uso a Minisita, tuafafine foi ia paia o lo tatou atunuu, atonu o lea o le a ou le laa loa i ai i le vaega lea.

Ae tau ina ou faatalofa atu i le mamalu o le itumalo o Palauli le Falefa, le paia o Tapaau e fa o Alii, faapea Aiga. Alalatai foi Tootoo e fa o le tatou itumalo. Le saofaiga o Saoao ma Tamaitai, Faletua ma Tausi, faapea le malosi o le tatou itumalo, malo le soifua.

E faatalofa atu foi i le paia o le aufaigaluega a le Atua, i ona Fatafaitaulaga e fia i totonu o si o matou itumalo, o lo o nonomanu i le atinaeina o le agaga faale-agaga i totonu o nuu ma alalafaga i totonu o lo tatou itumalo, malo le tapuai, faafetai tatalo. Ae tapuai maia se i fai so tatou sao i le Tala o le Tupe ua i lumamea nei o le tatou Palemene. E talitonu e le toatele foi ni sui usufono na faaali o latou finagalo i le Matagaluega o lo o i lalo o lau auaunaga.

O lea o le a faamuamua atu i le Matagaluega o Tina ma Tamaitai, Atinae o Nuu ma Afioga ma Agafesootai. O le polokalame lea i le atinaeina o itumalo, e faatatau i le \$200,000 lea ua amata ona faamaape, i nisi o itumalo ua uma ona saina a latou feagaiga. E faafetai i sui usufono sa o latou laga le mataupu e uiga i taiala o lo o faatino ai le galuega, le \$200,000 lea. Atonu o lena ua manino lava i totonu o tatou taiala le faaaogaina o vaegatupe lea ua faamatuu muamua atu. O le naunautauga ina ia tapena ma faatu ai ia Ofisa ma vaega faapena ma faatulaga le aufaigaluega, sauni uma ai totoga o le tatou Ofisa, ina ia mafai ai ona faatino galuega. Sa i ai foi se sui usufono sa ona laga ia le taumafai lea e mataitu lelei le faaaogaina o nei tupe, ona e taua tele le silafia foi e le Malo pe na sao ma tonu le faaaogaina. Ia faafetai mo le faamanatu. O la ua faatulaga atu aiaiga i le faaaogaina o nei tupe. O lena e i ai lava le tofa feliuliuai a le Fono Faavae, e mafai ai ona latou faia ni fesuaiga talafeagai. Ae o lo o faatumau lona faamaumauina lelei, ina ia mafai ai ona maioio ma malamalama se mafuaaga e ala ai ona fai se fesuaiga talafeagai. Sa i ai se sui usufono sa fesiligia, pe toe maua le \$800,000 lea e totoe mai i le \$200,000 mo le tausaga nei, o le tali e le iloa. Se i faaoga muamua le \$200,000 lea pe faapei, ona sosoo ai lea ma le miliona i le tausaga fou, ona toe fua lea i ai. E masalo a lelei lava le faaaogaina, ou te talitonu foi, o le a faapena foi ona fetuutuunai ia le tatou Malo, ia toe i ai nai

faaopoopoga i isi tausaga ia e totoe o le tatou Paeaiga. Mo le tatou miliona tala lea o le a sosoo atu ai nei, pe a pasia le Tala o le Tupe, e tatou te mulimulitai lava i le faatulagaga lea na faatulaga ai le \$200,000. E toe faia foi le isi tatou feagaiga fou, funding agreement. E sui foi ona aiaiga ina ia talafeagai ma le faatulagaga, ma o le a i ai foi ni taiala fou o le a faapea ona faaalua atu i itumalo, ina ia mafai ai ona latou mulimulitai i le faaaogaina o le vaega lea. E sosolo lava taiala, i le tatou fuafuaga mamao lea ua uma ona faataatia. O lea o lo o ave ai lava le faamuamua, i le taumafaiga o le atinaeina o le soifua maloloina, ona faasolosolo ifo ai laia i le atinaega o se tamaoiga e gafataulimaina, ma isi vaega na ua uma ona folasia atu i le tatou Tala o le Tupe. E faapena foi ona talia atu i totonu o tatou taiala ia, ia le fetuutuunai foi a le Fono Faavae, i le faaaogaina e fuafua i latou fuafuaga mamao ia e tataua ona latou saunia ma tapena lelei, ina ia mafai ai e le tatou Matagaluega ona mataitu ia le faaaogaina o le vaegatupe lea. E na o le pau lena o manatu ma finagalo sa faaalua, ona o le tele o fiangalo na aumai, o le faafetai mai i le tatou Matagaluega ma le Malo, e tusa ai foi ma lea faamaite, e pei ona saunoa foi i ai le Afioga i le Minisita o Aoga.

O le vaega lona lua, o le atinaeina o Agafesootai, sa i ai se fesili i le \$10,000 lea o lo o faaagaga mo le polokalame a le Soifua Maloloina o le ANCD, o le a se tulaga o lo o i ai. E pei ona silafia, i tatou fonotaga ia sa fai, sa faamalamalama atu ai le agaga o le polokalame lea, ma lona faaaogaina. E aumai e le Fono Faavae le latou talosaga mo le faaaogaina o le polokalame ia, e faalelei atili ai o le soifua maloloina. Ma o le taimi nei, e 21 itumalo, la ua talitonu o la ua tuu i totonu o a outou tusitupe le tai \$10,000. O lo o i ai taiala o lo o ua avatu, e mafai ai ona outou faaaogaina le vaegatupe lea, o lo o i ai foi ma le taimi faatapulaa e avatu e tataua ai ona faaaogaina le vaegatupe lea. Ona aumai ai lea o se tou lipoti i le Matagaluega i le faaaogaina o le vaega lea. E tatalo atu ia i latou ua amata ona latou faaaogaina le vaegatupe lea, ina ia tatou mulimulitai i fautuaga ia ua momoli atu, e faapena foi ma taiala, aua e le uma ai. A faapea foi e le iloa pe maea le mea lea, ona toe tilotilo laia po o lea le isi taimi e toe faamamulu atu ai se isi vaegatupe.

O le naunautaiga lava, ina ia taumafai ia i ai se suiga i el tastou soifua maloloina. O lena e silafia le tulaga o lo o taatia ai le soifua maloloina i le tatou atunuu. O tulaga o tatou falekomiti, o lea foi sa faatulaga atu le tai \$10,000 e ave i nuu ma alalafaga o la ua i ai falekomiti. A o i latou o la e pei e falekomiti tauave, o la e fai a le o le fale o le faafeagaiga, po o se fale o se pulenuu, po o se fale le tumau o lo o i ai, o lea la e faamatuu atu i ai le tai \$6,500 mo falekomiti ia. Ua uma ona fai le asiasiga a le tatou Matagaluega, ma o lea ua aumai ai le lipoti o le aofai o nuu o lo o i ai o latou falekomiti, ma falekomiti le tumau ia. A o le agaga o le tatou seleni ia, ina ia toe faatotoga lelei ai falekomiti, ina ia ave a se fale e mafai ona fai ai auaunaga a tina ma tamaitai, i le vaega lea o le soifua maloloina. Ae le gata i lea, ae o lo o faamamafa mai foi le faatinoga o polokalame mo le sauaina o aiga

aemaise o tina ma tamaiti. O le faatinoga o polokalame tau le aganuu, ia e avea foi ma fale mo polokalame o pisinisi laiti. O le taumafaiga ia faatotoga lelei ia falekomiti, ina ia mafai ai e tina ma tamaitai ona faatino a latou polokalame ia, e auala atu i le tatou Fono Faavae. O le vaega lena i tatou seleni ia. O le taimi nei, ua 70 le aofai o falekomiti i Upolu o lo o agavaa i ai i le tatou seleni lea, e 61 falekomiti i Savaii. A o latou e falekomiti le tumau e 89 i Upolu, ae 24 i Savaii.

O le isi vaega sa laga e le mamalu o sui usufono, o le polokalame lea o le taofia o sauaga i aiga. O lo o i lalo o le vaega lea o auunaga o atinae o soifuaga lautele ma agafesootai ia polokalame o lo o faatino i lalo o le vaega lea, o lo o taulia ai ma polokalame lea o le taofia o sauaga i aiga. O le mea taitasi 3730, o le a faatino ai ia le polokalame lea.

E faafetai mo le lagaina mai o le polokalame lea, ona o se vaega taua tele i le Matagaluega. Ae o le a toe fai se fetuutuunaiga ma le Matagaluega, ina ia toe faataatia lelei, ina ia toe faataua atili le faatinoga o le polokalame lea, ona o le tele o le numera o le tulaga o lo o faapea ona faailoa mai ai i fuainumera ia le tulaga tuga, o lo o i ai ia le vaega lea.

O le isi mataupu o lo o laga mai foi, e 2 tatou polokalame na o lo o faaalua mai foi, ua le o toe i ai ni vaegatupe, ua ave i ai, o le polokalame o le ie Samoa ma le teuteuina o aai. O le mafuaaga ua leai se seleni e ave i ai, ona ua manatu le Matagaluega se i fai se iloiloga aoao tetele o le polokalame lea, aua e talu lava ona fai polokalame nei, e le i iloa lava ona fai ma fai ni iloiloga po o a ni faamanuiaga o aliae o lo o taatia mai, impact assessment, ina ia mafai ai ona toe faatulaga lelei e le Matagaluega le faatinoga o polokalame lea, ma o le a faapea foi ona fai se soalaupule ma le fono faavae ina ia latou tilotilo pe o i ai se fetuunaiga e mafai ai foi ona faatino e fono faavae le faatinoga o polokalame ia. So, o le mafuaaga la lena o lea ua faataatia ai mo le taimi nei. Ou te talitonu o se vaimeia o le 3 i le 4 masina o le a taumafai ai e fai le iloiloga lea. Ia o lea lava e tele le tatou tausaga, o la e foi e i ai a tatou Tala o le Tupe Faaopopo e mafai ona toe tuu i ai i totonu pe a faapea o le faaiuga o le iloiloga lea, ua tulaga mai i se vaega e iloa ai o le a mafai ona i ai se suiga i le mea lea o le tulaga mama pe a faapea i le teuteuga o tatou aai, ma le mea lea o le toe faamalosi o tu ma aga i totonu o aiga. E le gata i lena, po o le a se ituaiga faiga i le Ie Samoa e mafai ai ona avea le vaega lea ma mea e maua ai tupe maua faaauau a i latou o le a latou faaogaina le vaega lea o le polokalame. Ia, ona maea ai lea i ina o faafesili sa aumai i le Matagaluega o Tina ma Tamaitai.

Na i ai nisi o sui usufono sa talanoa i le tamaoiga ma le tau o le soifuaga, lea sa faapea mai ua maua le tau o le soifuaga. Ia, ona o au foi o le Minisita o Fuainumera, o le vaega tonu lava lea latou te aumaia fuainumera ia, lea la o lo o faaoga e le tatou Matagaluega po o i latou foi o lo o faia faiga faavae, ae laitiiti lava sau faamatalaga i ai, ona o le faaigaina ma le faalauteleina o le faaogaina o fuainumera ia, e patino i isi Matagaluega a le

tatou Malo. Ae na ona ou faapea atu, o mea lava ia o lea e tapena e le tatou Ofisa o Fuainumera, o le tapenaina o fuainumera i le fua o le tamaoaiga, lea e faapapalagi o le GDP ma le tapenaina o le fua o le tau o le soifuaga, lea e faapea o le Consumer Price Index. Ia ma le mea mulimuli lea, na o le tolu lava iloiloga ia ou te fia taua, ae tele isi ituaiga fua e mafai ona tatou tilotilo i ai, a o le fua mulimuli, o le fua o le mativa. O le fua o le mativa, aua o lea o le tele o atunuu o le lalolagi faapena foi ma tatou, e i ai lava le fua faasafua o le mativa e iloa ai i latou o lo o soifua i lalo ifo o le laina lea o le mativa ma i latou o la e i luga atu. A o le fua o le mativa o le a ou tago e faamatala laitiiti atu lava i se gagana faigofie.

E lua ituaiga mea e fua ai le mativa, o le mea lea e tau o le atomeaai e maua ai le malosi talafeagai ma le ato o isi mea e faasoaso lua ma le atomeaai. O isi la mea ia e tuu i ai i le ato lea, o le i ai o le fale, o le maua o le vai, o le maua o le eletise, o le lava o lavalava, lelei le soifua maloloina, lelei le aoga, maua fesootaiga, faigofie feoaiga, mea faalelotu, mea faalenuu, mea faaleaiga. O lona uiga o lea e fai mai ina ia maua uma le aofai o mea ia, o i ina la, a faapea o la e te mauaina uma, o i ina e fua ai le tulaga o le mativa.

O suesuega sa faia e le tatou Matagaluega i le 2018 o lea la e maua mai ai, e 43,946 le aofai o tagata e i lalo ifo o le fua o le mativa pe a faapea e fua agai i le metotia o lo o faaoga e le Matagaluega o Fuainumera i le tulaga lea. Ia, o se luitau ia tatou, ona o le mafuaaga tonu lea na ala ai ona faamuamua e le tatou Malo ia le ave o le faamuamua i le soifua manuia, aua e tataua ona taumafai ina ia tuutuu i luga ma faatutusa lelei le tulaga o le mea foi lele e taua o le standard of living, ina ia mafai ai ona tatou fiafia faatasi ma uso a tagata faapena foi ma aiga. O se luitau ia tatou. O lea ou te vaavaai atu i i i le fuainumera...

Susuga Maulolo Tavita Amosa: Lau Afioga i le Taitaifono...

FOFOGA FETALAI: Ia, se i malie lau Afioga i le Minisita se i... o lea ou te vaavaai atu e te le i lauga i le Matagaluega lea. O le a le mafuaaga o lau faauilavea?

Susuga Maulolo Tavita Amosa: Lau Afioga sa taua i lau lauga le GDP, le fua lea o le GDP lea e taua mai i i aua o lea ua tautino e le Afioga i le Minisita, o lana Matagaluega tonu lava lea e i lalo o lana auaunaga lea e gaosi mai ai le fua lea.

FOFOGA FETALAI: Saunoa lau Afioga.

Susuga Maulolo Tavita Amosa: Faafetai i lau Afioga i le Minisita. Pau lava lea o lau fesili, aua e pei ua masani lava tatou i le vaogagana lea faapea o le GDP lea e fua ai le tamaoaiga o le atunuu. Ae malie foi la i le

faalogologo atu i lenei afiafi i le fua o le mativa. O lau fesili, a faatulaga, e i ai se fua faia o le GDP ma le fua o le mativa? ina ia tatou faigofie ai ona iloa, a faapea o le level lea ua oo i ai le GDP, o lona uiga ua valalata agai i le poverty or whatever you call it le fua o le mativa a po o le poverty measures a?

Pei na pau lava lena o sau faafesili faamolemole.

FOFOGA FETALAI: Ia, saunoa lau Afioga i le Minisita.

Afioga Hon LEOTA LAKI LAMOSITELE: Faafetai mo le fesili. Se i ou toe fesili i le vaega lea o lo o i ai poto faapitoa ia e maua mai ai vaega ia ona avatu lea o se tali maoti i se taimi. Ae sao lelei oe pe a tatou tilotilo foi lele i relationships a. A faapea o le GDP lea e i luga i i a o le fua o le mativa lea e i i, pe i ai se mea foi lele, se fesootaiga mai lea tausaga i lea tausaga. O le mea lena o lea ou te faaeteete ou te tali atu ina ne i te i ua faaletonu lau tali, ae se i toe fesootei atu i le mamalu foi o le Ofisa ona maua... ae manaia le finagalo. Faafetai lava mo le manatu. Ae mo le faaauauina...

FOFOGA FETALAI: Ia, e i ai se mea o totoe o le...

Susuga Maulolo Tavita Amosa: Lau Afioga i le Fofoga Fetalai, leai e puupuu lava si toe faaopoopoga. O le taua ia o le mataupu lea ona o lea ua saunoa mai le Afioga i le Minisita o le a toe fesili i le Matagaluega, tuu atu la i ai lau Matagaluega pe a talafeagai, po o le a la se tulaga i le polofaasoa lea o le decentralize o tatou fesoasoani tau tupe lea i i i le tulaga i le relationship lea.

Ia o nai motugaafa e tuuina atu i ina aua le tatou galulue faatasi mo le agai i luma. Faafetai lava.

FOFOGA FETALAI: Ia, saunoa mai lau Afioga i le Minisita.

Afioga Hon LEOTA LAKI LAMOSITELE: Ia, faafetai i lau Afioga. O la e faalogologo mai le Matagaluega ma faapea foi o la e ua... ma e sao lelei oe, a faapea tatou te tilotilo i vaega lautetele foi ia e 4 o le atunuu, o lea o lo o i ai le taulaga i Apia ma o i le itulagi lea ia outou i Aana ma... e pito i sili lava ona maua lea le mativa i totonu ole taulaga, e 28.6% le aofai o tagata i totonu o le taulaga o lo o maua ai i le mea lea, a o o la i le mea lea e faapea o le north west Upolu, lea e lavea ai Aana ma Tuamasaga, e 23.8%. Ia, a o le vaega o totoe o Upolu, e 18%. A e fia alu la i se nuu e tau leai se mativa, o Savaii e 17%. Ia, ae taua foi lele i le tagai i ai aua e sao lelei le saunoaga, o le vaai la lea i le tatou polokalame lea o le a faagasolo nei i le atinaega o nuu ma itumalo, aua o lea e toe sauni foi le isi foi suesuega faapea o lea o le a amata, o lea o le a amata i le tausaga lenei. E faamoemoe la e toe maua mai

ai foi le fua a le vaega lea i le fua o le mativa lea, ia ona maua ai loa lea o se avanoa e tatou te tilotilo ai agai i tua atu. Aua o le fua o le mativa lea sa fai i le 2013, ua sili atu la le maualuga o fuainumera i le 2018 i lo le 2013. O lona uiga pei o le mea foi lele o la e alu faapea i luga le GDP, a o la e foi e alu atu ai lava ma le mativa, e pei e foliga mai e tau o faatasi lava le maualuga o le GDP ma le fua o le mativa. O lea la tatou te fia iloa pe faapefea ona tupu mai lena mea. Aua o lea e fai mai le vaega ia o...

Afioga Lupematasila Galumalemana Tologata Togia Tile Leia: Lau Afioga i le Fofoga Fetalai...

FOFOGA FETALAI: Malie lau Afioga i le Minisita... ia na e lauga i le mea lea o le GDP?

Afioga Lupematasila Galumalemana Tologata Togia Tile Leia: Sao lelei lau Afioga i le Minisita. E leai se manatu e fia faalavelave i le saunoaga matagofie a le Afioga i le Minisita. E ese foi faalogona i lenei afiafi. Ia, e le tau selu atu, leaga o le Afioga i le Minisita o le tagata e tele ona tomai ma agavaa i mataupu ia e talanoa mai ai. E momoli atu le agaga faafetai. Ae na pau lava le mea lea e tau faafesili atu ai, pe le i oo le silasila a le Afioga i le Minisita ma le Matagaluega, aua e oo lava i atunuu e malolosi tamaoaiga, e maualuga le GDP lea tatou te talanoa ai, e toatele foi tagata matitiva la e i ai. Ae pei o le mea lena o lea e tulaga muamua Samoa pe a sao lau matau i le siitia o lona tamaoaiga i le GDP lea e i ai, pe \$10,000 ea a le tagata e toatasi. O lea e vaai i le average o le tamaoaiga o le atunuu. Ma le faaaloalo.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai mo le faasaoina o le taimi o le Afioga i le Minisita...

FOFOGA FETALAI: Sa e lauga i le GDP?

Tofa Hon Lauofo Fonotoe Nuafesili Pierre Lauofo: Sa ou lauga i le DGP.

FOFOGA FETALAI: Ia saunoa lau Afioga.

Tofa Hon Lauofo Fonotoe Nuafesili Pierre Lauofo: Faafetai i lau Afioga i le Minisita. E ese le manaia o le mataupu ua oo i ai le saunoaga a le Afioga i le Minisita. O lea ou te nofonofa lava ma ou matau o lea ua talanoa agai le poverty line ma mea o fua foi ia e fua agai i ai le mativa ma vaega foi lea e i lalo o le poverty line. Aua o lea foi ou te manatua pei lava o le tasi lea millennium goal o le elimination of poverty. Ia o mea ia faa-UN po o Malo Afaatasi. O lau fesili la lau Afioga faamolemole, po o fua ia e

fai ai le survey a lau Matagaluega ma saili ai po o fia pasene o tagata i lalo po o luga o le poverty line, po o fua ia mai le Malo Aufaatasi lea e faaaoga e tatou? Aua i lau foi matau, o fua ia a le Malo Aufaatasi, o la e foi e faaaoga i atunuu la o Aferika, Initia, atunuu na ua ou vaai tino i le mea e tau o le mativa. Ou te masalo ua vaai uma i ai nisi o le tatou Maota ma le tatou atunuu i luga o le TV pe afai e le i oo atu i ia atunuu, a o au na ou vaai tino lava i ai i o i atunuu ia, e le i taitai oo tatou i mea e tau o le poverty. Ioe. O atunuu, e matautia le mea la e i ai i atunuu la, a o tatou iinei i Samoa, ia o la e fua le ulu fua le fai, matua le talo, matua le taamu, fua le mago, fua le esi, ia tausami foi le fasipopo pe a faapea o le a le tulaga e i ai. Ae a fai la o lea ua ou faalogo atu ua faamamafa tele le mativa, ae a tuu atu i fua, ia leaga o fua lea e mafua ai ona ou fesili po o fea e aumai ai fua ia e fuafua agai i ai le mativa lea e saunoa i ai lau Afioga i le Minisita. E pei o le faafesili atu lea ma le faaaloalo.

FOFOGA FETALAI: Ia, o lea ua manino le... ia o lea lava e pei e taumafai le Minisita i se faaupuga foi lele ina ia vave ona malamalama. Ia, lau Afioga i le Minisita.

Afioga Hon LEOTA LAKI LAMOSITELE: E le fou metotia ia na faaaogaina e le tatou Malo e fai ai mea ia, ua leva ona faaaogaina e le tatou Malo metotia ia mai... o lea ou te manatuaina, masalo o se vaimeia o le 1970 na amata ai ona fai mea ia lea e tau i le faapapalagi o le household and income survey, aua na o le pau lava lenei o le ituaiga metotia e mafai ai ona fua le tulaga lea i totonu o Samoa. Ou te masalo o le faafitauli, faatoa faalogologo lea o le vaega lea i le Lipoti lea, e manaia lava le faalogologo i le GDP foi lele i le itu lea, ae le o fia faalogo i le itu faanoanoa lea o lo o i ai. Lea e i ai le mativa, e aiga ma le sauaga, e aiga ma le tele o mea o faafitauli ia e tulai mai. E tatou te le tau talanoa pe tau fai atu e aoaia atua le mamalu o le Palemene, ae le faapea foi la o ou tago tuuai atu se isi. Na pau lava mea ia taumafai le tatou Palemene, e le o faapea foi a faapea o la e matitiva tagata i Amerika, lona uiga la e tatau ona matitiva tagata iinei. E leai se mea faapena e tatau ona i ai. O le uiga la o lau faamatalaga, o lea e mananao le tatou Malo ina ia fai se fuafuaga i ai ia toe faalau atu le mea lea ua lelei tele atu. E le faapea a... aua o lea ou te iloa le tatou GDP lea e i ai, i le faaiuga o le 2021, e \$2 piliona 191 le GDP la e faamau i le Ofisa o Fuainumera. A faapea la e fua i le aofai o le tatou population lea e \$200,000, e \$10,955 per capita ae le o le mea lena o lea e i ai, e \$3 i le itula le tatou totogi mauualalo. A e tago la e fai le \$3 i le itula, e le taitai ona au i ai i luga i i. Ia tau mai la e outou pe aisea, aua e tatau ona aiga le mea lea o le per capita lea pe a faapea e sao le tou fuafuaga ma le tulaga o lo o i ai totogi o tagata a...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai o le fesili la e fia malamalama faamolemole i le mea lava lena e saunoa i ai...

FOFOGA FETALAI: Ia, ou te ofo i lou le malamalama o lena e matua manino le saunoaga a le Minisita.

Tofa Hon Lauofo Fonotoe Nuafesili Pierre Lauofo: O la e manino ae i ai lava le isi vaega lea ou te fia fesili i ai, po o lau polokalame la lea ua faataatia mai, le miliona lea, o le fofoga lea o mea uma ia e te saunoa mai ai? Ma le faaaloalo.

FOFOGA FETALAI: Ia, lau Afioga i le Minisita.

Afioga Hon LEOTA LAKI LAMOSITELE: A faapea e tou te talitonu i le polokalame, o le isi lena fofoga tele lava o le mea lea, faapoopo i ai ma le faamaoni ma le taumafai e toaaga e fai ia lelei, fai faamaeaea ma fai ma mafauafau i le toatele o le atunuu e manuia ai. O le amataga lea o le tatou polokalame lea, ou te tautino atu, e uma ifo le tatou Paeaiga lenei, ua alu i lalo fuainumera ia. Aua e pei ona ou fai atu, e le o se mea e faapopoleina ai tatou, o tatou lea e i totonu o le Maota lea, e i ai le tatou responsibility e tatau ai ona tatou taumafai ina ia tau faasaosao tatou fuainumera ia. Aua a tatou tilotilo atu i ai i isi fuainumera na tou te silafia, e tatau ona tatou taumafai i se tulaga e tuutuu ai i se tulaga lelei fuainumera i aoga, o le soifua maloloina, o le soifua manuia ma isi lava vaega. E oo foi i le vaega lea o leoleo, falepuipui, ia la e ua faatele Tanumalala ona e i ai le mafuaaga, a o le mea sa tatau ona i ai, sa tatau ona tau tuutuu i lalo.

Ia, ona faamaunu atu ai lea o se faamatalaga i le folasaga, na o nai mea foi nei sa faamanatu atu.

FOFOGA FETALAI: Se i tulai mai le sui usufono o Falelatai ma Samatau po o... O se isi mea e ese mai po o...

Afioga Lupematasila Galumalemana Tologata Togia Tile Leia: Faafetai i lau Afioga i le Fofoga Fetalai mo le avanoa. Ia, o si mea laitiiti lava lea. E ese lou fiafia i le saunoaga a le Minisita lea, o le saunoaga e faatupu manatu, o lea foi la e fia avatu ai se manatu. Na saunoa le Sui Taitai o lenei Vaega, e le i vaaitino lava i le ituaiga mativa lea e mativa ai atunuu i fafo e pei o Aferika iinei. A o lou lava talitonuga lea e i ai, e leai se mativa iinei i Samoa. O lea sa taumafai foi lenei Vaega Faaupufai i lea Paeaiga ma ia tausaga ua mavae e faamama le faiga o faalavelave i totonu o nuu, totonu o aiga, totonu o le Ekalesia. E to lou pulou i lau Afioga i le Minisita ma le Faigamalo pe afai ae mafai ona maua se faamama avega o mea ia, aua o lou

lava talitonuga, o lea e lava a le tamaoaiga, a o le tele o mea ia e pologa ai tagata i le taimi lenei, ia, faavasega ifo e outou. Ae to lou pulou i lau Afioga i le Minisita o lo o nafa ma nuu ma afioaga pe afai e mafai ona faaauau le miti lea sa galulue atu ai foi lenei Vaega ina ia faaitiitia mea fai i totonu o nuu ma afioaga ma aiga, e oo lava i Ekalesia. Ma le agaga faaaloalo.

FOFOGA FETALAI: Ia, o lea ua maua atu le agaga o le sui usufono. Ia se i tulai mai lau Afioga i le sui usufono o Tina ma Tamaitai lau Afioga Aliimalemanu.

Afioga Aliimalemanu Moti Momoemausu Alofa Tuuau: Faafetai i lau Afioga i le Fofoga Fetalai. Faafetai i lau Afioga i le Minisita, ua matagofie le faalogologo atu aua o lau matafaioi tonu lea na fai ai le investment a le tatou Malo i lau Afioga e te afio atu i fafo i le tele o aoaoga, ia, lea tonu lava ua e saunoa ai i lenei afiafi. Malo faafetai, ua taliga e fia faalogo. Pau lava le mea lea e fia faasao, o lea na e saunoa matou te le i faalogologo muamua i ai, leai. Ua leva ona matou iloa le fua lea, ae pei o lea sa saunoa atu se tasi o sui usufono, e ese foi auuala sa taumafai e fofu ai le faafitauli lea, ae faafetai o lea ua faamaite mai isi auuala fou, isi matatia fou po o nisi matafaioi, ia tatou o laia, tatou o e fai pe mata e tuuitiitia ai le gap lea pei ona e saunoa. Faafetai.

FOFOGA FETALAI: Malo faafetai. Ia atonu o lea ua avatu foi saunoaga foi e... oi...

Afioga Magele Sekati Fiaui (Faasaleleaga 2): Lau Afioga i le Fofoga Fetalai, mo se avanoa faamolemole...

FOFOGA FETALAI: Oi, o se isi saunoaga faalaeiau i le Minisita? Ia, tulai mai lau Afioga i le sui usufono o Faasaleleaga 2.

Afioga Magele Sekati Fiaui: Faafetai i lau Afioga i le Fofoga Fetalai. Ia, ona e talitonu o le 90% o lau lauga lea na fai na faatatau lava i le tulaga lea o le mativa. Faafetai e fiala lava e faalogologo, e tele lava ina pei e tutusa ma mafauauga ma le Afioga i le Minisita i le tulaga lea i le... O le agaga foi lele o lea ua taua e le Afioga i le Minisita tulaga o fuainumera ma pasene, le tulaga o le mativa ma tulaga faapena. Ia, i lou sui usufono aua o lea foi ua saunoa nisi, e le mafai lava ona faatusatusa tatou ma atunuu la e i fafo. Ae ia te au lava ia ma lou sui usufono, e pei foi ona saunoa le Afioga i le Minisita, o le aiga e le o tulaga lelei lona tamaoaiga, afai e le i oo i ai le vai, e le i oo i ai le eletise, o tulaga faapena e le o lelei le faleui, tulou, ia, ia te au ia, o tulaga ia o le mativa i le tatou atunuu, o lea e pei... leaga o lea foi sa ou taua, o le isi lena vaega sa taua i lau lauga, o le \$1 miliona lea ua fuafua e le

faigamalo, o se tasi lea o auala o le a taumafai e foia ai lea faafitauli i le poverty line lea e i lalo.

O le agaga la e soso atu ai i le Afioga i le Minisita, pe a faapea e te i ua... le \$800,000 lea e totoe, ae manaia ae faasoaso na o Savaii aua o lea e foliga mai na o le 17% lea e i ai le tulaga foi lele o le mativa i Savaii. Ma le agaga faaloalo.

FOFOGA FETALAI: Malo faafetai. Ia se i tulai mai lau Afioga i le Minisita mo Faatoaga.

Susuga Hon Laauli Leuatea Polataivao Fosi: Faafetai mo le avanoa. E leai se agaga e faalavelavea ae na ona tuu atu lava o le fesoasoani i le Afioga i le Minisita. O le 2014 i le 2015 na tatou see ese ai mai faigamalo matitiva, least development nation, o le fua lena lea sa tatou sau ai fai mai ua siitia le tamaoiga o Samoa mai atunuu tauatiae i le atunuu ua mafai ona latou atiaeina e latou lava latou. Ae na ona ou faaoololomaau leaga o lea e atagia i saunoaga a le Minisita, e le o tutusa a tatou faamaumauga. O i lea e avatu ai le tuualalo e toe silasila lelei i le mea lea e faamaumau ma le mea lea e tupu i le atunuu. E matua le tutusa lava lau Afioga i le Fofoga Fetalai. O le ala lea e avatu ai pea le tuualalo i le tulaga e fua i ai le fua o le tamaoiga o lea tatou te agai e maualuga le GDP, a o lea e tamomoe atu ma faafitauli. O lea tatou te vaai i ai i le siitia o uta i le tatou falepuipui, le Samoa Victim Support, le tele o faafitauli le fasioti tagata ua agai i luma. O a mea e mafua ai mea ia? Le lava le faaso. O le mafuaaga lena o mea ia e tutupu. O lena la ua outou saunoa mai ma outou talisapaia le mea lea sa tatou finau ai foi i le la Tala o le Tupe tele ua uma atu, o le tatou \$1 miliona. Pau lea o le auala fofu vave, tatou te agai i ai e ave tupe i lima o tagata e sili ona manaomia le fesoasoani, faataavili mai la le mea lea. Ma le tuualalo lava i le Afioga i le Minisita, o faamaumauga, e taua tele. Leaga e se lava le mea lea e faamaumau, a o le tulaga i le alu ma le faatinoina o le gafataulimaina, e le o taitai gafataulimaina. O le \$10,000 lea e tau nei e tofua le aiga ma le \$10,000, o fea le moi o lea mea? E leai se mea. A o lea faatoa tau faataavalevale atu nei, o le tatou laasaga muamua lea, ave le fesoasoani i lima. O ai? Aiga, nuu, itumalo, Malo, Ekalesia, ia ona taavale mai loa lea i totonu o le tatou Malo. O le faiga fou lena o lea ua saunoa i ai le Minisita, ia ma le talitonuga i le agaga faafetai o lea ua amata ona malamalama mai lena Itu.

Ia, o si au faamanatu lena i lau Afioga i le Minisita.

FOFOGA FETALAI: Ia, masalo o lea ua tele lava ina manino.

Afioga Lupematasila Galumalemana Tologata Togia Tile Leia: Lau Afioga i le Fofoga Fetalai...

FOFOGA FETALAI: E i ai se isi mea e ese mai, o lea ua uma ona e saunoa ma aumai lou finagalo.

Afioga Lupematasila Galumalemana Tologata Togia Tile Leia: Na o si tamai mea lava lea lau Afioga, leaga e le taugamalie le saunoaga a le Afioga i le Minisita. O lona uiga o lea ua tuuaia le aufaigaluega, tuuaia le faigamalo sa i ai i le sese o faamaumauga ia. E pei o le tulaga lea o lea e taumafai atu ai se vaivaiga.

FOFOGA FETALAI: Ia, ou te iloa o la e... ia, malie le sui usufono mamalu, a tatou o nei e matau a tatou faamatalaga, ua toe toso i tua le tatou galuega. A o le saunoaga lava ia a le Minisita o la e ua oo i lona tulaga faa-Minisita o Fuainumera Famaumauina, ia o lea foi ua taatia fautuaga a le Maota aemaise foi o le saunoaga a le Minisita o Faatoaga, se i toe silasila totoia i le tulaga lea ina ia manino mea uma ia ia o faatasi ma le tulaga o i ai le atunuu. Ia se i tulai mai lau Afioga i le Minisita.

Susuga Hon Laauli Leuatea Polataivao Fosi: Ia, e leai se agaga e faataumatatao i le saunoaga a le sui usufono mamalu. Talanoa mai le tagata sa saofai iinei i le Nofoaiga lea na uma nei, ona malamalama lea o le mataupu. E tuusao lava le gagana. E le o se mea foi e tau faamatalaina le mea lea i le taimi lenei. O le Matagaluega o Faatoaga ma Faigafaiva, e ese lava le mea la e faamau i lalo i le export la e maua, e se le mea lea e tupu. Aisea? E le o maua uma le faamaumauga o mea la e ave i fafo. Ou te le i fai atu faapea o se isi lava itu, o faamaumauga na, e ese lava le mea la e tusi i lalo o le revenue a le Agriculture, ese le mea la e lau e tagata i fafo. E le o maua uma faamaumauga tau faatoaga. O le ala lena o lou fai atu, ae malie le sui usufono, ia, leaga o lea faatoa e ulufale mai i le Maota, ou te iloa e tele se mea e te le malamalama i ai.

Afioga Lupematasila Galumalemana Tologata Togia Tile Leia: Lau Afioga i le Fofoga Fetalai...

FOFOGA FETALAI: Ia, e i ai le manatu le sui usufono mamalu, o le a fai le fefinauaiga i le tulaga lea, ae o lea lava e manino tulaga o le mataupu. E talitonu foi, a tatou oo nei i le mea lea e te fesiligia, ia ua toso i tua le tatou galuega. O le mea lea ou te faamalie i le sui usufono mamalu, leaga o lea ua tali le Malo, o le tali lava lena e tataua ona tatou lagona uma ia tulaga, ma o la e foi e taumafai le Malo ina ia faamalamalama atili.

O le mea lea lau Afioga i le sui usufono mamalu, ou te le toe taliaina se isi au fautuaga i le taimi lenei, o lea ua agia lou finagalo, o lea foi ua e saunoa i le tulaga lea, o lea foi ua tali manino le Minisita. Ia faaeteete foi o lea e

faafogafoga o tatou itumalo i tulaga ia. O le mea lea e i ai le manatu, o le a faauma mai le saunoaga a le Minisita i lona tulaga faa...

Afioga Hon Tapunuu Niko Lee Hang: Lau Afioga i le Fofoga Fetalai, pe maua se avanoa lau Afioga.

FOFOGA FETALAI: Ia se i tulai mai le...

Afioga Hon Tapunuu Niko Lee Hang: Leai na ona ou fia faamanatu atu lava i le Afioga ia Laauli, o mea ia o le fua lea o le atunuu foi lea e vaivai tamaoiga, e le i faia e tatou, e fai mai e le UN mai faamaumauga ia e avatu i tatou Lipoti. Ne i meaane ua tuuaia maia le matou faigamalo, o matou na siitia i luga le tulaga, ae le o tutusa ma fuafuaga. A o la e foi sa saofai ai i le matou Kapeneta. E faamanatu atu i lau Afioga.

FOFOGA FETALAI: Faafetai. Ia atonu o lea e faafogoga mai le Minisita o Faamaumauga, atonu e aoga foi fautuaga ma saunoaga foi atonu e aoga e faufau ai foi le Matagaluega aua faamaumauga mo le agai i luma. O le mea lea...

Susuga Hon Laauli Leuatea Polataivao Fosi: Ia o le a taatia ai ia faapea lau Afioga i le Fofoga Fetalai, o le a lafo ia e faaauau le saunoaga a le Afioga i le Minisita o Faamaumauga, ae tatou o ia faapea.

FOFOGA FETALAI: Ia, lau Afioga i le Minisita, ona o lou manatu lava i le Minisita o Faamaumauga ua toe... ae faaauau maia le saunoaga.

Afioga Hon LEOTA LAKI LAMOSITELE: Ia, ou te talitonu foi ua lava lea lauga. Fai mai foi le tala a le isi toeaina o le matou aiga, [.....].

Ia, e momoli atu le faafetai i sui usufono mamalu sa aumai latou faafesili ma latou fautuaga i le tulaga o lea e toe teuteu ai foi tatou galuega nei, aemaise lava i Faamaumauga, ou te talitonu e... o lau fautuaga aua o la e ua uma ona toe faatulaga lelei le Ofisa i le faatinoga o ana galuega, o la e maua lava le avanoa tou te o ai i le Ofisa e maua mai ai faamaumauga e aupito i sili ona lata mai e tai pei o Me i le masina lea na tea nei o lea e faapea mai, e 8.2 le tau o le consumer price index po o le tau o le soifuaga. O lona uiga pe a faatusatusa ia Me 21. O lona uiga o le siitaga lea e 8.2 o le 12 masina. A e tago la e vaevae le 8.2 i le 12, e le atoa se pasene na siisii mai ai le tau o le soifuaga mai ia Me i le 21 e tau mai i le taimi lenei. O le faatusatusaga o Me ia Aperila i le masina nei, e na o le 0.1%. O i latou lea e faapea mai i le fua maualuga o le tau o le soifuaga, tatou tilotilo po o le a le uiga o le faaupuga lea o le fua maualuga e tataua ona oo i ai, ona faapea loa laia, o le

fua maualuga. A o le a foi le maualalo e tatau ona oo i ai, ona iloa ai lea, po o le a le fua maualuga. A faapea ou te faia se faataitaiga, o le oloa sa \$1 ia Me i le 2021, o lea ua \$1.08sene ia Me i le 2022. E tasi le tausaga ae valu sene le mea lea e sii ai. E na o sina faataitaiga faafaigofie foi lea, ina ia iloa ai le taua o le tou silasila lelei i fuainumera, ona mafai ai lea ona aumai finagalo, a o la ua lava le tulaga e mafai ai ona lagolago. Ia faafetai i le Fofoga Fetalai.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, O le manaia ia o fua la e talanoa mai ai, o fua maualuga ma le fua maualalo, ae pau le mea lea e iloa e matou e le malamamlama i ni fua, o le tau o le pusamoa lea sa i ai ia Oketopa o \$40, ae toeitiiti \$80. E faapea foi tagasima, sa \$25, a o le aua \$41, ma lou faaaloalo lava. E le tai valu sene...

FOFOGA FETALAI: O lea ua maua ia mea, ua oo i ai saunoaga i le taimi ua sola. E talu ai ua e oo foi i ia mea ua faapea mai, ua umi ai talanoaga. O le a uma lau saunoaga... ia lau Afioga i le Minisita, ia o lea o le a aveese upu ia na e saunoa i ai, ne i popoto tele, e manatu tele i a outou afioga i Minisita, ina ia usitai i tatou Tulafono Tumau, aua le faauigalua ni tatou faamatalaga o lo o faafogafoga le Maota ma le atunuu. O se fautuaga lena, ae faamaea maia lau saunoaga o lea ua maea.

[Upu na faatonuina e le Fofoga Fetalai e aveese mai faamaumauga o le saunoaga a le Minisita o Tina ma Tamaitai, Atinae o Nuu ma Afioga ma Agafesootai: *“aua le soona faapopotoa telea.”*]

Afioga Hon LEOTA LAKI LAMOSITELE: Ia faafetai tele i lau Afioga mo le avanoa ua faamalo faafetai i le mamalu o le tatou Palemene, o sui usufono mamalu uma o le Fonousu i lenei afiafi, faapea le mamalu o le Kapeneta, Minisita Lagolago faapea foi i le la Itu o le Maota.

O le a foi sa outou faalogologo mai i se gagana ua paopapa ia faapea ona lafo i nuu le aina.

FOFOGA FETALAI: Se i onosai mai lava lau Afioga i le Minisita, se i tulai mai...

Tofa Ale Vena Ale: Lau Afioga i le Fofoga Fetalai, ona o lea o le a faaiuiu le saunoaga a le Minisita, sa ou faatalitali lava se i saausi lelei le saunoaga a le Minisita. Ona o le mataupu lea sa ou laga i le Palemene, o lea foi na tulai mai ai le Afioga i le Minisita o Faatoaga. A o lea la ou te fia tautala atu i le

taimi lenei, manu lea ua afio mai, aua e le i afio mai le afioga i le Minisita. Ua faafetai tele lava mo le faamautuina, leaga o lea e te le i afio i le taimi lea sa ou tautala i le mataupu lea i le faamautuina o le Komiti o le Fono Faavae o le itumalo lenei o Faleata 4. E tele feteenaiga e tele foi faafitauli sa tulai mai. Ona o lea e te le i afio i le taimi lea na ou tautalagia ai le mataupu lea, na saunoa mai le afioga i le Minisita. O lea ua ou tulai atu ai, e momoli atu lau faafetai tele lava i le amanaia o se tuualalo a au nei, ma le itumalo o Faleata 4. O lea ua uma ona lesitala le komiti, faafetai tele lava. O lau faafetai lena faapitoa i lau afioga, e tusa ai ma lou amanaia o le tulaga i le fono a le itumalo. Lau Afioga i le Fofoga Fetalai....

FOFOGA FETALAI: Ia faamaea mai lau saunoaga.

Afioga Hon LEOTA LAKI LAMOSITELE: E faafetai i lau tapuaiga Samoa aemaise lava si ou itumalo o Palauli le Falefa, ia manuia faasausauga o le afiafi, ae ola le leo o lau auauna, faafetai.

FOFOGA FETALAI: Ua faamalo saunoa i lau afioga i le Minisita o Tina ma Tamaitai ma Atinae o Nuu ma Afioga ma Agafesootai. O lea foi ua maua o lau Afioga foi o le Minisita o Fuainumera Faamaumauina, e taua foi. O lea ua faafofoga foi le Maota i le tulaga o faamaumauga. Atonu ua aoga foi fautuaga a Minisita foi ma nisi o le Maota mo le agai i luma o le tatou Matagaluega ma latou faamaumauga. O le mea lea, malo faafetai. Aemaise foi o le tatou poloketi ma le tulaga o a tatou komiti i itumalo, malo faafetai o lea ua faamalieina sui usufono mamalu sa laga la lea tulaga. Ia tatou talosia ia lea faamoemoe, e toe siitia ai le tamaoiga o nai o tatou aiga ma le atunuu, malo faafetai.

Ua oo mai le tatou faasologa i lau Afioga i le Minisita o Tupe. Tulai maia lau Afioga e pei e tele lava i lau afioga le tatou mataupu i le Tala o le Tupe, ma le faaaloalo.

Susuga Hon MULIPOLA ANAROSA ALE MOLIOO (Minisita o Tupe): Ou te tulai ma le agaga faaaloalo, lau Afioga i le Fofoga Fetalai o le Maota, aemaise foi le paia lasilasi o le tatou Palemene. O lea foi ua matau atu o lea ua oo mai le fetu a le tamaloa. E matauina foi ua ufitia le tatou lalolagi i le pouliuli. Ou te talitonu o le natura lena o le soifuaga ma le natura o le siosiomaga ua uma ona faataatia e le Atua ia tiute ma faiva i le ao, aemaise foi a ufitia i tatou i le pouliuli, ua oo foi i le taimi e malolo. Ae ui i lea, ua uma ona tofofi i tatou e le Atua e ala i lo tatou valaauina. O le a lava le leva o le po, leaga e faigata, o tiute ma faiva na valaauina ai i tatou e le Atua.

O le lagona foi lea, ou te fia aumaia ai le Salamo e 42, “Le Atua e, e faapei ona naunau le aila i vaitafe, o lo o faapea ona naunau lou agaga ia te oe. Ua

fia inu lou agaga i le Atua, o le Atua Soifua. O a fea ea ou te alu atu ai, ia iloa ai au i luma o le Atua. Ua faia ou loimata ma au meaai i le ao ma le po, o i fea ea lou Atua.” Lau Afioga i le Fofoga Fetalai, e talitonu e faapena sou lagona. I le aso muamua faatoa ou toai taunuu ai i lou Ofisa i lou tulaga faa-Minisita o Tupe, sa maligi lava loimata. Aisea? Sa le faigofie le savaliga, sa feagai pea ma luitau o le olaga ma le soifuaga ma le valaauina. Peitai ane e i ai lava le taimi e momoli mai ai le filemu o le Alii. O lea foi la ua tatou aiga fesilafai, o i tatou o Taitai o le atunuu, o i tatou ua tusilima i ai itumalo e 51, e fai ma leo, e fai ma vae ma lima tulou le gagana, se i faaleoina ma faatinoina lo tatou valaauina e ala i o tatou tofiga ma tiute, faa-sui usufono, faa-Minisita Lagolago, faa-Minisita i so o se Matagaluega, aemaise foi o le saofaiga a Ofisa Sili o Pulega o Matagaluega a le Malo. E talitonu e faapena se lagona lau Afioga i le Fofoga Fetalai.

I lou ulufale mai, e paga lava le agalelei o le Atua, i le tulaga foi faa-Minisita o Tupe, sa ou vaai i le tamaoaiga o Samoa, sa ou matau i totonu o lana paketi. E lata i le 70% i le 80% o le tamaoaiga, o lo o tagi lava i lima o le tatou atunuu. E oo mai foi i le tatou Faigamalo, e le o se folauga faigofie. A ou toe tepa i tua i tausaga ua mavae, 2 tausaga, o tapena mai lo tatou atunuu. O le tausaga lenei, o lea faatoa sao i tua le faamai. O lea faatoa tatou oo i le tulaga na tapena mai ai le tatou Faigamalo, i tausaga e lua ua tuanai atu. Ma le tatou naunautaiga ma le tatou tulivae i luma o le Atua, aua ne i oo mai le faamai. O lea ua i ai le faamai i totonu o tatou laufanua. Ae sau foi le faamai, o lo o agai mai ma ni lesona taua e lui ai i tatou. Sa ou faalogo i nisi o saunoaga a nisi o sui usufono, we need to think outside of the box, e sao lelei. We have been very comfortable to be in that box. E le o mafai ona tatou agai i tua, tatou tilotilo mai i totonu, sa o tatou soona fefefe pea e le oo mai se faamai.

Ae ua matauina i le agai mai o le tatou Malo fou, sa feagai pea ma luitau, e tele luitau. Ua oo mai i totonu le tatou Faigamalo ua alu i luga le tau o le tatou soifuaga, e pei foi ona malie i saunoaga ma fetalaiiga a lo tatou Maota. E oo mai foi i totonu le tatou Faigamalo, ia ua i ai aafiaga o le faamai, lea foi ua tele ina lokaloka ai le tatou atunuu. Ma ua tatou lagona ai le iuleo, ua violate le tatou saolotoga. O lagona lena na oo mai foi ia te au ina ua lokaloka le tatou atunuu, sa le masani ai, sa o tatou saoloto feoi lava a tatou taavale i luga o auala i le ao ma le po. Aepeitai ane, o lea ua lokaloka ma tatou oo ai foi i tulaga, e tatau foi, se i tatou toe tilotilo, vaavaai po o le a le mea e tatau ona fai.

Ia tatou tilotilo i luitau, luitau o le Koviti-19, o le aafiaga o le tamaoaiga, toe faaopoopo mai ma le taua i Rusia ma Ukraine. Ua sii ai i luga tau o ola ma suauu, o mala faale-natura ona o suiga o le tau. Ia aemaise ai foi, e le o toe po malae, i le gasegase o Upufai o Malo ua tau faaofiofi mai ai le sa folau o lenei Itu. O vaega uma ia, sa ou nofonono ma ou matau ma ou tilotilo, e tulaga ese le taimi lenei. Ona sa tatou te le i oo muamua i ai. Ou te le i vaai

foi i tua atu i Tala o le Tupe i tausaga talu ai, o i ai se \$30 miliona na ave i nofoaga e faanofoesea ai ia tagata e malaga mai, ma maua i faamai. Ia ae paga le agalelei o le Atua, o lea lava sa tatou matauina, o tupe maua mai i tagata tafafao mai atunuu i fafo, o le isi a tatou faaola totoga lena, o le isi a tatou tupe maua lena sa faalagolago i ai lo tatou atunuu. Ae peitai ane ua oo mai aafiaga o le faamai, ma matau ai, mai le \$500 miliona e agai i le leai o se mea. Sa tatou fememeai, o fea ea le Atua? se i fesoasoani mai i le tatou faasoa. Ae paga le agalelei o le Atua, a tatou vaavaai i le laveai a le Atua e ala i tupe faamomoli, o i ina e ata ai le tautua a le tagata Samoa o lo o malaga ese atu ma Samoa, ae faatino mai lana tautua aitaumalele i totonu o le tatou atunuu. Atonu o le sao lena, e taua ia i le taimi lenei o lo o tatou fememeai ai, po o fea ea le Atua e fesoasoani mai? A o le lava ua laveai. O ai o lo o laveai? Laveai lava o tatou tagata. E matau atu i faamaumauga, ua ova i le \$55 miliona i masina taitasi, o lo o sasaa mai ai le tamaoiga o a tatou tama fanau, o tatou aiga o lo o tuua lo tatou atunuu, ae se i o se i saili malo aua taimi faapenei. E oo lava i le taimi lenei, o lo o tatou matauina pea le agalelei faasoa a le Atua. Ae a tatou toe manatu i aso ia, fai mai o le tautua a le tagata Samoa, e alu i tua i le faatoaga. E alu i tua i le sami, e alu i le eleele, o fua o faatoaga, o vaega uma ia e fai ai lana tautua i le Matai. Ae ua ou matauina....

FOFOGA FETALAI: Ou te faamalulu atu i lau Afioga i le Minisita, e talu ai o lea ua oo i le tatou taimi malolo, tatou malologa o le afiafi. O le mea lea e faamalulu atu ai, o le a faaauau lau saunoaga pe a tatou taliu mai i la tatou malologa.

O le mea lea o le a faataatiaese Galuega a le Fono Aoa mo lana malologa o le Afiafi.

Na faataatiaese Taulumaga a le Fono Aoa Faitulafono mo lana malologa masani i le itula e 7:45 i le po ma toe faaauau i le itula e 8:21 i le po.

FOFOGA FETALAI: Ou te faasilasila atu ua toe amatalia nei Taulumaga a le Fono Aoa Faitulafono.

Faamalo le onosai i le tatou Maota e tusa o le tatou galuega. Ua maea uia foi le ala sao e pei o le upu i le sasagaua a le tamaitai Salafai. Ia faafetai i le tatou Ofisa i le gasesega o le afiafi.

E faataatiaese ia tatou Taulumaga mo le malologa o lo o saunoa talifuitau le afioga i le Minisita o Tupe. O le mea lea ou te tapa ma le faaaloalo ia lau afioga i le Minisita mo le faaauauina o lau saunoaga.

Susuga Hon MULIPOLA ANAROSA ALE MOLIOO: Faafetai i lau afioga i le Fofoga Fetalai, faaleoina foi le agaga o le faafetai i le tatou Ofisa o le Fono, e tusa ai foi o le faasiligamalosi, e maua ai se malosi o le tatou Palemene e faaauau ai i le itula e 10:00.

Ia e tatou te malolo i le tatou Fonotaga ae ua oo lau folasaga o lo o talanoa pea i le aotelega i le tulaga o le tautua a le tagata Samoa i aso ia. O le tautua le tagata Samoa i aso ia, ia e saili i le sami, saili i le vao, ia saili foi i le talaloa.

Ia tapena mai ia aua le matai o le aiga, aua faafeagaiga, ae maua ai ia faamanuiaga.

O le eseese o aso nei, ua matauina ua agai i fafo o tatou tagata. Ua agai i fafo ia o tatou tagata aisea? Ia latou te o foi e faatino le latou sailiga malo. Ailoga lava e i ai se Samoa e malaga ese atu ma lona atunuu e le susue le faamalama ma tilotilo mai i lona aiga i manaoga o lona aiga. Ia ma o lagona lena, e faaleoina ai le agaga o le faafetai. I le aotelega foi la o le tatou Paketi, o lo o matauina e le tuuitiitia le agaga o le faafetai i tulaga o tatou pisinisi tatou Private Sector. E tele lo latou sao i lo latou foi tiute ma matafaioi i le saili mai o le tamaoiga aua lava ia le faatinoina o le latou foi sao taua i totonu o le tatou Paketi.

Ae a ia tatou paaga mai i fafo? E matauina e le mafai ona tatou o ese ma lo tatou sootaga ma tatou faigapaaga ma a tatou paaga mai i fafo. O i e matau ai le agalelei faaso o le Atua ia Samoa ma e viia ai pea le alofa ma le agalelei o le Atua. Na i ai le taimi na o tatou fememeai ai ia le tagata soifua ma faapea ifo, ia ua leai se isi mapusaga. Ae e i ai lou talitonuga, o le mea e gata ai le malosi o le tagata, o i ina e faaauauina ai le alofa ma le alofa faapalepale o le Atua, e ala i Lana faaso. E ala i Lana tuumumusu, i o tatou tagata i lo latou tiute ma lo latou matafaioi. E i ai lo latou sao mo le atunuu.

O lea foi la ua matau i totonu o le tatou Paketi ua i ai suiga. E pei lava ona o tatou matauina i le Sini Autu o le tatou Tala Faatatau Autu o le Tupe 2022/2023, *'Folau Faatasi e Faamaite le Faatupulaia o le Tamaoiga, ina ia mausali mo le Manuia o Samoa'*. E tele lava se feau taua o lo o momoli mai e lenei autu, folau faatasi. O lona uiga o se faigamalaga e tatou te malaga faatasi. O ananafi e tapena ai nei, o nei e tapena ai taeao. Ma e matauina, ou te le faagaloina foi le faaleoina o le agaga faafetai ia le tatou faigamalo sa tulai mai i le foe i ia tausaga ua mavae, sa tele le sao i le tapenaina o le tatou foi atunuu i ona tulaga laulautetele.

O lea foi la ua tatou toai taunuu mai i le tatou Faigamalo Fou i le afioga i le Tamaitai Palemia, le Sui Palemia ma le Kapeneta i afioga i Sui Minisita ma sui usufono, ia atonu o le auga foi lena e tatou te folau faatasi. E faaleoina ia le agaga faafetai i le afioga i le Sui Taitai, o le tatou Itu Agai, afioga i sui usufono. E tumatila e tumatie lo outou tiute faaitu Agai e tou te tuualalo, e tou te fautua mai i ni vaega e mafai ai ona latalata atu i le 100% tapenaga a le tatou faigamalo.

O lea foi la ua matauina mai i totonu i lau faalogologo atu i le aotelega o saunoaga ma fetalaiga, ua tele mea fou o le tatou Paketi. Ioe, o faamaite, o le agaga faamaite e tutusa ma le agaga taulagalaga. A faamaite se mea, o se mea fou e i ai sona taunuuga. Ae o le agaga taulagalaga foi lena, e faatoa iloa ai e le tagata, e i ai le isi faamoemoega i tua atu. E i ai le vaaiga taulai e tulituli le taunuuga ma le taunuuga ia faatupulaia ma ia mausali le tamaoiga. Ia tele, ia lava, ia mautu, ia faasopolia tagata uma. Ia ma le taunuuga, ia manuia tagata uma, ia manuia Samoa.

E talitonu o suiga fou lena o le tatou Paketi i lona aotelega. I lau matau i ai ae ou te le i oo mai i le Palemene, sa ou vaavaai o a vaega uma, e omai uma lava tagata Samoa i le taulaga o Apia. Sa leai se tuu atu o se avanoa i nisi o vaega o le tatou atunuu. Atonu o i lea e sau ai ia le upu lea, it was all centralised. O faiga fou a le tatou faigamalo o tulai mai, decentralise, talatala atu i tua, talatala atu i tua, aisea?

E i ai vaega o le tatou atunuu e le o i ai lo latou sao i le atinaeina o le tatou atunuu. O tagata malolosi, o tagata o lo o i ai le tomai, o tagata o lo o i ai le potu ma taleni eseese, e tatou te mananao i se atunuu, e galulue tagata uma aua le atinaeina o Samoa, lea e i ai le tatou \$51 miliona.

O ni mea fou, atonu o lea e matauina e le tatou Palemene nei, e tele foi ni faamatalaga i ia vaega uma. Ae atonu o le lagona lena ma le vaai lena ina ua tapena le anavatau a le tatou faigamalo fou. O le naunautaiga na o le afioga i le Tamaitai Palemia, o lana Kapeneta, ma lenei foi Itu, ia tofu sao tagata uma, tofu sao tagata uma i le atinaeina o le tatou atunuu. A lea e i ai ia le tatou \$51 miliona. A lea ua i ai le sao o Alii ma Faipule. Ua i ai le sao o faletua ma tausii. Ua i ai sao o e o lo o i ai manaoga tumau. Ua i ai sao o tina ma tama matutua.

Ae a le au Sa Levi? O e o lo o tulivae i luma o le Atua, aua le manuia o Samoa. Ae a alo ma fanau o lo o aitaumalele mai i atunuu i fafo? A lo latou sao lena. Ae a pisinisi o lo o i totonu o le taulaga o Apia? O lona uiga e le o i ai se isi e le o i ai lona sao i le atinaeina o le tatou atunuu. E faaopoopo mai ai ma le sao taua a tatou faigapaaga mai atunuu i fafo, paga le agalelei o le Atua, atonu o le aotelega lena, o le tatou Paketi.

I le tou matau foi i ai i lau faalogologo atu i saunoaga. Ia ua pei ua sui le Paketi, ua sui le faaso, ua leai ni a tatou atinae tetele. Ua ave le faamuamua a le faigamalo i e o lo o i ai manaoga faapitoa, manaoga tumau. Ua ave le faamuamua a le tatou faigamalo ia i tina ma tamaitai, i vaega o lo o i ai le sauaina. Ae o nisi na o faamuamua i totonu o taiala o le lumanai manuia 2022-2025, ia o vaega tumatila lena, ma le naunautaiga ia ogatotogalemu, le soifua manuia o tatou tagata.

E i ai isi taimi ou te faalogoina ai foi le iuleo ua tatou tilotilo i tupe lava ia e maua mai i totonu o le tatou atunuu. Ae e i ai le talitonuga o le tasi lea o tiute ma matafaioi a le tatou faigamalo, saili nisi tupe fou. E faapefea ona faatino ia vaega. E tatou te tilotilo la i le taimi lenei. E matauina le tulai mai

le faamai ua i ai luitau ua le lava le tatou faasoa. Ae e i ai talitonuga o le tatou faigamalo, e i ai nisi tupe fou o lo o matauina foi i isi atunuu o le lalolagi, o lo o maua ai foi le latou tamaoaiga. Ma o le tiute lena ma le matafaioi ma o lo o taumafai lava ia le tatou faigamalo i le afioga i le Tamaitai Palemia, Sui Palemia ma le Kapeneta, o a auala, e i ai ni faiga fou e faatino? ina ia mafai ai ona o tatou tilotilo e aumai ai nisi faiga fou po o nisi tamaoaiga fou, o lo o faapena ona maua ai le tamaoaiga, o isi a tatou atunuu.

Ia e faaleoina le agaga faafetai i le tatou Itu o lo o agaia ia le Malo, i lou ia foi tulai mai i totonu o le Palemene, e ese foi le taua o le lua o iuleo. E taua i le matou tapenaga ma le naunautaiga ia tau i manu. Ia toai taunuu tatou i le taunuuga o lo o manaomia i totonu o le tatou taiala ia manuia tagatanuu uma o Samoa.

Ia e talitonu, o le aotelega lena o se manatu i vaega uma sa saunoa i ai ia sui usufono ma e uma i totonu o le tatou Palemene.

Afioga Aliimalemanu Moti Momoemausu Alofa Tuuau: Lau afioga i le Fofoga Fetalai...

FOFOGA FETALAI: Ia malie lau afioga i le Tamaitai Minisita se i tuu atu le avanoa i le Sui o Tina ma Tamaitai o Alataua i Sisifo.

Afioga Aliimalemanu Moti Momoemausu Alofa Tuuau: Faafetai mo le avanoa, sa le fia faalavelave lava a o alo le afioga i le Tamaitai Minisita i le aotelega o lana saunoaga, a lea ua matau atu o le a see i le isi vaega o lana saunoaga Faa-Minisita, ae sa i ai le vaega sa ou fesili ai i le Polokalame tonu lava lea o le Sauaga o Tina ma Tamaitai, lea faatoa uma ona e taua le ave i ai o le faamuamua i lenei Tala Faatatau o Tupe. A o o lau fesili lena sa i ai pe o le a le mea ua leai ai? Pe ua uma? Po o ua le toe i ai ia faafitauli ua leai ai se vaegatupe?

E na ona faamaoti mai lava po o gafea tonu o le tatou Tala Faatatau o le Tupe o i ai ia vaegatupe ia mo le Polokalame lea o le Sauaina o Tina ma Tamaitai.

Faafetai mo le avanoa.

FOFOGA FETALAI: Ia lau afioga i le Minisita. Po o maua mai ia le faafesili

Susuga Hon MULIPOLA ANAROSA ALE MOLIOO: Faafetai Aliimalemanu mo le faafesili. Ia, e saolele lava ia le saunoaga. E tau lava ina faamanatu i le tatou Palemene, o le masina o Setema na faamaonia aloaia ai le tatou Tala o le Tupe 2021/2022. E oo mai i le taimi lenei, ia ua uma ona

faamatuu atu nisi o vaega. Atonu e \$1 le miliona na sa faaagaga i totonu o le Paketi i le tulaga lava lea o le tali atu i Sauaga i Tina ma Tamaitai.

O le afa o le \$1 miliona lena, ia sa faamatuu i le tatou Toomaga mo e Puapuagatia. Ia manatua foi e i ai tatou Faiga Faavae, e i ai vaega e tuu atu muamua, e faatino mai ai le lipoti ma le update i le taimi lenei, ia toeitiiti lava maea faatino le vaega lena, ua faamaea ona faamatuu atu. E le iloa pe laitiiti lava pe \$100,000 se tupe e le i maea ona faamatuu atu.

O isi vaega o le tatou vaegatupe lena, ua uma ona tufatufaina i a tatou Sosaiete. O lo o feagai lava le vaega lea o le tuutiitia o Sauaga i Tina ma Tamaitai. Ae e i ai le talitonuga, atonu o lea sa maua foi i le saunoaga foi ma le faamaninoga a le tatou Minisita o Tina ma Tamaitai, ia o lea sa i ai ia le tatou vaegatupe i lalo o le Matagaluega ua faamatuu atu i tatou NGOS e mafai ai ona faatino ma faaauuina ia lea foi lea galuega taua o lo o i totonu o taiala mo le manuia o Samoa.

E \$500,000 o lo o faamatuu i lalo o le tatou Paketi a le Minisita o Tina ma Tamaitai, ia e lagolago ai ia tatou NGOS ia, ia e pei o le isi vaega lea e pito sili ona taua, o le faaauuina pea o le sootaga a le Matagaluega o Tina ma Tamaitai ia ma tatou NGOS ia, lea e faatino vaega lea.

Afioga Aliimalemanu Moti Momoemausu Alofa Tuuau: Lau afioga i le Fofoga Fetalai...

FOFOGA FETALAI: Ia se i toe tulai mai le sui usufono, malie lau afioga i le Tamaitai Minisita. Pe ua faamalieina lau faafesili?

Afioga Aliimalemanu Moti Momoemausu Alofa Tuuau: Ia faamolemole se i na ona toe faamautu mai pe sao ia le faalogologo atu. O le vaegatupe lea mo Polokalame o le Sauaina o Tina ma Tamaitai o lea ua le toe faatinoina e le Matagaluega o Tina ma Tamaitai a ua faamatuu i tua i NGOS le \$500,000? O lea ou te tau autilo atu i lalo o le Matagaluega o Tina ma Tamaitai o lea ou te fiu e sue i i . Ae e le afaina se i leaga o le a alu ai le taimi o lau saunoaga. Ia se i uma ona toe faailoa mai lea.

FOFOGA FETALAI: Ia saunoa lau afioga i le Tamaitai Minisita.

Susuga Hon MULIPOLA ANAROSA ALE MOLIOO: Ia, faafetai, atonu o lea sa tele foi ni fesili sa agai mai i le tulaga lava o le tatou Tala o le Tupe.

A o le i oo la se faamatalaga i le tatou Tala o le Tupe 2022/2023, ou te fia oto atu lava ni vaega taua o le Tausaga Faaletupe 2021/2022 lea o le a faamaeaina i le faaiuga o le masina lenei. O lenei Tausaga Faaletupe o le a faamaeaina i le Aso 30 o Iuni 2022. O lenei Tala o le Tupe o lo o faagasolo sa le i faigofie lona tuufaatasiga aemaise le faatinoina e na o le 9 masina le

taimi sa faatamoe ai le faatinoina o atinae sa faatatauina i le Tala o le Tupe lenei.

Sa le i nofonofu le tatou Malo i le taumafai pea e faatino le auaunaga, e ala mai i Matagaluega eseese aemaise o taumafaiga e toe unai ai ia le tamaoaiga Ae e le gata i lea o luitau sa feagai ai ma le atunuu i le tele foi o vavao ma lokaloka sa faatino ona o le pipisi o le faamai. A fua lava la i le 9 masina sa tuuina mai ai le faatuatuaga i le Malo, e faatino ai ia tatou atinae ma galuega sa pasia e le Palemene, e i ai se taimi e auina mai ai ia tatou Tusi po o Public Accounts o le Tausaga Faaletupe lenei i le tatou Palemene.

Lau afioga i le Fofoga Fetalai, a o le i oo atu se faamatalaga i mataupu na laga e nisi o sui usufono mamalu, e fia tuuina atu pea se faamatalaga agai i le Faavae o le Tala o le Tupe mo le Tausaga Faaletupe 2022/2023. O le tausaga 2021, o le tausaga lea na matuai pau maualalo ai ia le tatou tamaoaiga. O lea sa faamauiina i le 7.4%. O le Tausaga Faaletupe nei 2021/2022, o lo o i ai se fua faatatau e faapea o le a toe pau foi ae na o le 3%.

O aafiaga tuga nei o le tamaoaiga ona ua sau faatasi le pipisi o le Koviti-19 ma le siitia o tau o oloa aemaise o suauu ona o le taua o lo o tupu mai i Ukraine ma Rusia.

O le vaaiga taulai mo le Tausaga Faaletupe o lo o loma nei 2022/2023, o lo o fuafuaina se faatupulaia laitiiti o le tamaoaiga o le 0.6%. O lenei siitaga po o le faatupulaia o le tamaoaiga, o lo o aafia uma ai aafiaga e ono tulai mai ona o le pepesi pea o le Koviti-19, le faaauuina pea o le taua i Ukraine ona o le pule malosi o le Taitai o le atunuu o Rusia ma le fememeai ua i ai nei atunuu o Europa, ona o aafiaga o taua faatasi ai ma le lamatia pea o si o tatou atunuu i faalavelave e tutupu faafuasei faatasi ai foi ma nisi faamai e ono mulimuli mai.

Afioga Lupematasila Galumalemana Tologata Togia Tile Leia: Lau afioga i le Fofoga Fetalai...

FOFOGA FETALAI: Ia malie lau afioga i le Tamaitai Minisita ia se i tuu atu le avanoa i le sui usufono o Falelatai ma Samatau.

Afioga Lupematasila Galumalemana Tologata Togia Tile Leia: Faafetai i lau afioga i le Fofoga Fetalai mo le avanoa. E leai se agaga e fia faalavelave i le saunoaga matagofie a le afioga i le Tamaitai Minisita. Ae o lea ua taua le pau o le tamaoaiga Tausaga Faaletupe 2021/2022 e -3. Ae e fia faafesili atu ona ua le maua pe o le a le tulaga i le forecast na faataatia mai ai le Tala o le Tupe 2021/2022?

Ma le vaega lona 2, ua maua i tala o le lalolagi fai mai le faamatalaga a le Peresetene o Rusia, o le taugata o le tau o le soifuaga i le vaitaimi lenei, e le mafua ona o le taua lea e fai i Ukraine. Ia po o le faamai foi o le Koviti-19.

Ae fai mai le mau a le Peresetene, e mafua ona o le leaga o Faiga Faavae o tamaoiga o Amerika ma atunuu o Europa. Ma lou faaaloalo.

FOFOGA FETALAI: Ia o lea ua oo i Amerika ma Europa ia ma le finagalo o le Peresetene o Lusua. Ia ae saunoa mai lau afioga i lo tatou atunuu ma fuafuaga agai i luma. E faigofie ai foi ona malamalama le Maota.

Susuga Hon MULIPOLA ANAROSA ALE MOLIOO: Ia faafetai i lau afioga i le Fofoga Fetalai, ia o le manatu o le Peresetene o Lusua lena.

Ae i le tulaga o lo o faataatia ai le tapenaga a le tatou faigamalo, o lea lava e taumafai ina ia mafai ona gafataulimaina le tatou faasoia e ala i faiga fou ia ma faamaite fou ia, o lo o faatino atu i le taimi lena.

Lau afioga i le Fofoga Fetalai, o le vaai taulai ma fuafuaga uma ua folasia, ua aofia uma ai ia luitau na taua e sui usufono mamalu uma o le Palemene ua maea saunoa. Ua iloilo totoa ma lava tapena foi le Malo i luitau ma faafitauli uma o lo o popoe i ai le atunuu aemaise foi o sui usufono mamalu.

O le Polokalame mo Itumalo e pei ona auina atu i le Tala Faatatau Autu o le Tupe, o lea foi ua maea faamanino e le Minisita o Tina ma Tamaitai, o lo o faamoemoe e tuusao atu vaegatupe a le Malo, e faafaigaluega i totonu o itumalo, ina ia mafai ai ona vave faatupulaia le tamaoiga, o nuu ma alalafaga.

O Polokalame uma lava o lo o fuafuaina, e le na o le itumalo e tasi e manuia ai. O le a faamanuia ai isi itumalo, i le latou galulue soosootauau ai i atinae uma e pei ona folasia. O le a faamanuiaina ai foi le mamalu o le aufaipisinisi, aua o le a faaaogaina nei vaegatupe, e faatau ai mea faigaluega, o lauu toto, o tulaga manaomia mo le fausiaina o fale mo atinae, auala tau faatoaga, aemaise ai foi atinae ma aoaoga faaauau i vaega o le tamaoiga. E aofia ai Aoga, Soifua Maloloina, Taaloga, Siosiomaga, Faatoaga ma Faigafaiva, Suavai faapea le manuia o nuu ma alalafaga.

Lau afioga i le Fofoga Fetalai, o le \$51 miliona, o le a tului ma sasaa atu i totonu o le atunuu, o le a toe fotuai mai ai pisinisi na aafia i le Koviti ma ona vavao. O le \$51 miliona lava ia, na aoina mai i lafoga a tagatanuu Samoa, ma o le a toe faamatuu atu e atinae ai a tatou nuu ma alalafaga i se faiga e le i faia muamua e le tatou Malo. Ma o le a toe foi se vaega a le Malo, aua ana fuafuaga pe a totogi lafoga i luga o auaunaga ma fefaatauaiga o le a faatinoina e itumalo taitasi.

O le talitonuga lau afioga i le Fofoga Fetalai, o le faatupulaia ma le manuia o atinae i itumalo, o le a faatupulaia ai tupe maua a pisinisi, ma siitia ai avanoa faigaluega mo le mamalu o le atunuu. E le gata i lea lau afioga i le Fofoga Fetalai, o lo o i ai ni polokalame fesoasoani a le Malo, o lo o aofia i le Tala Faatatau o le Tupe 2022/2023, e pei o vaega nei:

- i. O le fesoasoani a le Malo e \$2.5 miliona, mo le Alamanuia o Tagata Tafafao Maimoa mai Fafao, e faaauauina ai le polokalame \$5 miliona, o lo o faatino i le Tausaga Faaletupe lenei 2021/2022 ua faapea ona faamanuiaina ai le silia ma le 160 faletalimalo, Ofisa Malaga, Mataaga ma isi auaunaga. O lo o aofia foi i le Tala o le Tupe se vaegatupe e \$3 miliona e tauala atu i le Samoa Business Hub, e fesoasoani atu ai i pisinisi laiti, ina ia toe faamaite, faalautele ma aofia ai uma pisinisi laiti, i le auaunaga ma le fesoasoani lenei, aua le tapena atu ai mo le toe tatalaina o tuaoi faava-o-malo i le lalolagi.
- ii. O isi ituaiga pisinisi tetele, o le a mafai ona faasoa atu i ai le \$5 miliona lea, o le a faatinoina e le Faletupe o Atinae o Samoa. O lenei vaegatupe, o le a faamatuu atu i le mamalu o le aufaipisinisi e ala atu i nonogatupe e mama tuutuuga. O lenei fesoasoani o le a faafaigofieina le faatinoina ona o le naunautaiga ina ia vave faamatuu atu nei fesoasoani e toe fotuai mai ai le vaega maoti mo fefaatauaiga ma nisi. O le a faaopoopo atu foi ma ni faamanuiaga o le aufaisaofaga a le NPF, o le a faatinoina i le Tausaga Faaletupe 2022/2023 e faailoga ai le 50 tausaga talu ona faatuina lenei Faalapotopotoga.

Lau afioga i le Fofoga Fetalai, na laga foi le tulaga o lafoga fou i luga o oloa o lo o aafia ai pea le atunuu i faamai le pipisi lea e aofia ai le sikareti, le ava malosi, vai ma lole suamalie, ma isi oloa taumafa o lo o mafua ai le tino puta. O nei lafoga, e le gata i le taumafai e uunaia ai le soifua maloloina o tagatanuu, ae o le a mafai ai foi ona uunai atinae tau faifaatoaga, failafumanu aemaise faigafaiva. O le taofi lau Afioga, e leai lava ni faamai e ono aafia ai o tatou tagatanuu pe a toe foi lava le atunuu i meatausami na tatou amata mai ai anamua. E pei ona silafia, o lenei luitau o faamai le pipisi ua loa tausaga o taumafai e tuuititia i totonu o le tatou atunuu. Ma o lo o matauina lava le faatupulaia ma le aafia ai o tatou fanau iti. O se tasi la lenei o taumafaiga a le Malo e tau tuuititia ai le faaaogaina o nei oloa mo le soifua maloloina o si o tatou atunuu.

Inflation, ia po o tau foi o le soifuaga e pei ona...

Afioga Hon Tapunuu Niko Lee Hang: Lau Afioga i le Fofoga Fetalai...

FOFOGA FETALAI: Ia, malie lau Afioga i le Minisita se i tuu atu le avanoa i le sui usufono o le Vaimauga 3.

Afioga Hon Tapunuu Niko Lee Hang: Faafetai mo le avanoa. E matau atu e pei ua alu ese le folasaga a le Afioga i le Minisita mai le vaega lea o le Turisi ona sa ou lauga ai i le mataupu lea i le \$10 miliona lea ua faaititia mai le Tala o le Tupe, lea ua faaagaaga mo le maketiina o le atunuu. O lea

foi e matau atu ua sau foi ma se isi faaopoopoga, o la o le a taumafai le Malo e toe atiae le turisi. O lau fesili i le tulaga lea, pe o i ai la ni tupe leaga o le isi mea sa ou taua i lau lauga, o mea ia o ni packages foi ia e faatosina mai ai le au turisi la e fai ai pasese o vaalele ma apitaga i faletalimalo. Sa ou faapea la o tupe lea na fuafuaina lea sa... le \$10 miliona lea ua aveese mai le paketi e fesoasoani i le maketiina o le tatou tourism. Na ole faafesili atu lava po o i ai la se isi... ona o lea foi sa saunoa mai le Minisita o le MNRE e faapea e i ai le faapolopolo lea... e le iloa po o le a le uiga o lea upu faapolopolo e \$12 miliona. A faapea la o se fuafuaga lea o le tupe lea e le i faaaogaina e le Pulega o le Turisi e fuafua mo nisi... e faatupe ai la le \$10 miliona lea ua le... O lau fesili, aua o lea e faapea o le roll over le seleni lea. Se i toe tagai ane lava lau Afioga i faiga faavae, pe i ai ni mea faapea e roll over ai ni tupe ua le faaaogaina. O le mea masani lava e toe ave lava i le Treasury le tupe ona toe faasoa mai lea i se Supplementary e sosoo ai. Na ona faafesili atu faapena, po o mulimulitaia faavae o tulaga o mea tau tupe a lo tatou Malo. Ona o lou popolega, o tupe foi nei lea e faapea ua le faaaogaina, o tupe mo la e i totonu o estimates. Seia vagana ua tapena mai accounts i le faaiuga o Iuni ona iloa lea o tupe mautinoa o la e i ai, actual cash. A o mea ia na o fuafuaga, tupe faatatau, a o lea ua fai mai o le a faaaoga.

Ia ma le isi mea sa ou taua ai lau Afioga i le Fofoga Fetalai, o le \$28 miliona foi lea ua le aoina faaopoopo i ai ma le deficit lea e \$89 miliona, e \$117 miliona le tupe lea na ou fesiligia, po o le a la se fuafuaga pe a le... aua o tupe ia e fuafua uma lava e faatino ai le tatou paketi lea, e aofia uma ai lava galuega lea ua taatia mai, a o lea la e fuafua le faapolopolo lea e \$12 miliona. Ia manatua lau Afioga i le Fofoga Fetalai ma le mamalu o le Palemene, o tupe i lou malamalama, o tupe foi ia e ono aumai loa e faatino ai mea ia e fuafua e le Malo. O tupe sa fuafuaina, o lea la e maua mai faamatalaga ua le faaaogaina, ona o le faamai ma isi lava mafuaaga, ae na o lou fia malamalama lava i fuafuaga la i le tulaga lea, pe tusa ai ma faiga faavae a le Malo lenei mea fou i lau faalogo o le roll over mai ni tupe ua le faaaogaina e faaauau ai ni galuega, e tai pei la o le tulaga lea ua i ai le Turisi, o lea ua aveese le \$10 miliona. O lona uiga la e fuafua e aumai le \$12 miliona, a o le fesili, seia vagana ua aumai le Tala o le Tupe annual accounts po o le faaiuga o Iuni ona faatoa iloa lea o le mea o la e i ai tupe pe leai ni tupe.

Ia o le fesili lena i lau Afioga i le Minisita o Tupe. Faafetai.

FOFOGA FETALAI: Ia o lea ua maua le finagalo o le sui usufono mamalu.

Afioga Sulamanaia Fetaiai Tauilili Tuivasa: Lau Afioga i le Fofoga Fetalai...

FOFOGA FETALAI: Ia mo le faasaoina o le taimi o lau Afioga, se i tulai mai le sui usufono mo Vaimauga 1.

Afioga Sulamanaia Fetaiai Tauiliili Tuivasa: E le i fia faalavelave lava lenei itumalo i le lauga matagofie a le Afioga i le Minisita, aemaise foi ua atili aulelei ai lava le Minisita i le sesega mai o lona laei foi i lenei afiafi. O lea na oo i le tulaga lea i tatou tiute ia ua siitia, lea foi sa lauga ai lenei itumalo. O le popolega e sii loa ni lafoga po o ni tiute e toe fifi foi i luga o le atunuu. E pei o le agaga la lena o lea sa avatu ai le tuualalo, se i silasila ane i le vaega lena lea o le a toe faaopoopo ai ni tiute i luga o taumafa ia na taua. Ae na avatu ai le tuualalo, a faapea o le tulaga na, aua e le mafai foi ona malolo kamupani e ona le... aua e le gata o lea o le a tuu i ai i luga le lafoga lea, ae taumafai foi la faipisinisi ia o le a toe faatauina atu le oloa lea ina ia toe siitia foi le tau o le pusamoa ma le tulaga lena, ae pei o lea e matau, ia ona o le agaga o le soifua maloloina.

E avatu ai foi la le tuualalo a lenei itumalo, o le a la le mea e le taofi sao ai loa la oloa ia e pei foi o le isi taimi lea na ban ai loa le mulipipi, tulou, ina ia aua ne i toe pau le tulaga i o tagata tagata i le taimi lenei o le taugata o le soifuaga, a o lea foi la o le a toe sau aua po o le a le tau lea e i ai nei o le pusamoa ma mea faapena. O lona uiga a toe tuu i luga le lafoga lea po o le tiute lea, ia ua tatou talanoa mai i se isi faamamafa avega ua tuu i le mamalu o le atunuu. E pei o le agaga lena i lau Afioga leaga o lea ua taua le mea sa ou lauga ai ina ia...

FOFOGA FETALAI: Ia, o lea ua maua le finagalo o le sui usufono mamalu. Ia, se i tulai mai lau Afioga i le Tamaitai Minisita.

Afioga Hon MULIPOLA ANAROSA ALE MOLIOO: Faafetai i lau Afioga i le Fofoga Fetalai. Faafetai foi i finagalo foi ma manatu ma fesili pei ona tuuina mai. E toe faamanatu lava i le tatou Palemene, e le i atoa le 12 masina o le tatou faigamalo, ma e le i fauina foi Roma i se aso se tasi. E taua le tuualalo, e taua foi le fesili foi a Tapunuu e tusa ai o le faalauiloina o le tatou atunuu, ma e tatau ona atagia i totonu o le tatou paketi. Ioe, o lo o i ai pea le tatou vaegatupe lena. Ae a outou tagai i le tatou \$1 miliona lea ma le \$51 miliona o lea ua faamatuu i tua i nuu ma alaafaga ma itumalo taitasi, e i ai le talitonuga, o itumalo taitasi ma nuu taitasi, e i ai latou historical sites ma latou vavau. O se tasi foi lea o matafaioi o lo o tuuina atu i totonu o tatou Komiti taitasi a itumalo, agai e profile, fai mai story, o lo o i ai tatou vavau na. Aua a matau atu e ova i le 300 nuu, e tofu lava le nuu latou ia ma lana vavau ma tala e faamatalaina ai historical sites i totonu o lona ia nuu ma le itumalo. A faapea la e faatino le vaega lea, o lona uiga, o le a faalauiloa le 51 itumalo po o le 300+ nuu i le lalolagi atoa. Ma e matauina i le agaga faaturisi, e sau lava le turisi mai Europa e sue mai le story lea na fai atu i luga i

i Falealupo. Aisea? O le agaga suesue a le turisi lea, ae i tua atu o lena vaega o lo o sasaa mai ai le tamaoaiga i totonu o le tatou atunuu.

Ua fesiligia foi nisi o vaega e iai tatou fund ia roll over. Ia e toe faamanatu atu foi ne i te i ua galo, e le i atoa le 12 masina o le tatou faigamalo. E 9 masina lea na tope ai le tatou paketi, ma taumafai e faatino ina ia vave faamatuu atu faamanuiaga lenei. E oo mai i le taimi lenei ina ua taumafai e faamaopoopo le tatou paketi, e \$19 miliona tupe e le o mafai ona faamatuu atu, ma ua maea foi ona faamaonia le tatou paketi 2021/2022. Pau lava le... i lalo o tatou faamatalaga o le tatou Public Finance Management Act, o lo o i ai le malosiaga i le tatou Ofisa Sili o Pulega o le Matagaluega o Tupe e mafai ai ona faatino le galuega lea o le roll over o funds ia. Ma o nisi na o vaega ua maea ona tuuina mai e tatou Matagaluega uma ia ma pasia foi e le tatou Kapeneta, ma o lo o i ai i totonu o le tatou tapenaga o lo o faia i le taimi lenei. Ae atonu o lea e fesiliga e le i faamaonia. Ae toe faamanatu atu, o le tatou paketi 2021/2022 lea na faamaonia ai vaegatupe ia, peitai, ua oo mai i le taimi lenei, o lea e le i maea ona faamatuuina atu. Atonu o le faamaninoga lena mo le silafia, aemaise foi le nofo malamalama o le tatou Palemene.

Tofa Hon Laufo Fonotoe Nuafesili Pierre Laufo: Lau Afioga i le Fofoga Fetalai...

FOFOGA FETALAI: Ia, saunoa mai lau Afioga i le Sui Taitai.

Tofa Hon Laufo Fonotoe Nuafesili Pierre Laufo: Ia o lea ua oo tonu lava le tali faamalamalama a le Afioga i le Minisita o Tupe i le mataupu lea na fesili ai le Afioga ia Tapunuu, a o le fesili foi lea sa ou fesili ai i le Minisita o le Siosiomaga a o lea la na lafo i o i le Minisita o Tupe e tali i se taimi e saunoa ai. O le mea lea o le roll over lea e taua, ona o le masani ma tulaga o Tulafono a maea le tausaga e le i faaaogaina le tupe, e toe foi lava i totonu, e toe foi lava i totonu e toe fai le faasoa. Ona e pei ona ou taua, ona o le Tala o le Tupe, o le Tulafono, is an Act of Parliament. A maea la le isi tausaga faaletupe aulia mai le isi tausaga faaletupe, e tatau ona i totonu o le tausaga faaletupe fou seleni ia. Aua o lea e aumai i lou mafaufau le payment process po o le release ina o tupe nei. O le faataamiloga e ui atu i le Ofisa o le Suetusi Sili po o le Okika. E tapa la e le Okika le Tulafono po o le vaega o le Tulafono lenei o le a pasia o la e i ai vaegatupe na ina ia mafai ona faaaoga faaletulafonoina. Aua a avatu i le Ofisa o le Okika ae le o i ai ni vaegatupe ia e i lalo lea e te saunoa ai o tupe e aumai o le isi tausaga faaletupe, ia ona manatu lea ua pei o se tulaga foi lea ua faasolitulafono le faaaogaina o tupe na aua e le o i totonu o le Tulafono lea o le a pasia nei o le tatou Tala Faatatau o le Tupe.

FOFOGA FETALAI: Ia, o lea ua maua le finagalo o lau Afioga i le Sui Taitai.

Tofa Hon Lauofo Fonotoe Nuafesili Pierre Lauofo: A o maua lou avanoa lau Afioga i le fesili lea leaga o lea foi sa ou fesili i mea ia o tiute foi lea o le NCD e faasaoina ai le avanoa o le toe tulai mai o le Minisita. Pe fia la se pasene lea o le a sii ai tatou oloa la ia, oloa ia lea e taua o mea o oloa lea o le a apalai i ai le sin tax, o le a se pasene o le sii lea o le a sii ai o le lafoga, a o le a se tupe o fuafua e maua mai ai, po o se revenue projection e maua mai ai e faaoga la i i le polokalame lea a le soifua maloloina o le taumafai e foia mea o faamai le pipisi. Ma le agaga faaaloalo.

FOFOGA FETALAI: Faafetai, o lea ua maua le faauilavea. E talitonu lava o lea ua tali le Minisita ma ou te talitonu foi o faiga faavae lava ia a le faigamalo, lea ua tali manino lava le Minisita. E oo foi i tupe ia e totoe, o lea foi ua saunoa le Minisita, o lo o i totonu o le Public Finance Act le malosiaga o le Ofisa Sili o Tupe. E le toe i ai la se isi faamatalaga i talaatu o le saunoaga a le Minisita o lea ua manino i totonu o le Palemene lenei, ae manatu o la e talanoa mai le Minisita i Tulafono o Mea Tau Tupe, ia ou te talitonu foi o lea ua manino lea tulaga. Se i tulai mai lau Afioga i le Sui Palemia.

Afioga Hon Tuala Tevaga Iosefo Ponifasio: Malo. Ma le agaga faafetai lau Afioga i le Fofoga Fetalai, leaga o lea ua saunoa mai le Sui Taitai o le la Itu, e pei o lea ua saunoa e agai i le Minisita o Tupe, a o lea ou te nofo atu o au lenei o le Minisita o Tupe Maua. E pei e agavaa le fesili ia te au. O lea ou faamalulu atu se i faasao ma uli le saunoaga a le Minisita ona oo mai lea i lou taimi ou tali atu i le tulaga tonu lava lea ua e saunoa ai. Ia ma le ava tele. Faafetai.

FOFOGA FETALAI: Faaauau mai le saunoaga a lau Afioga i le Tamaitai Minisita, faasao lava lou taimi taua o lenei lava ua e tapena i mea uma. Saunoa lau Afioga i le Minisita.

Afioga Hon MULIPOLA ANAROSA ALE MOLIOO: Faafetai. E i ai sui usufono na lauga i le taugata o le tau o le soifuaga. E le alofia lea tulaga, ona o aafiaga o luitau o lo o feagai ma atunuu uma o le lalolagi.

Afioga Hon Tapunuu Niko Lee Hang: Lau Afioga i le Fofoga Fetalai, e faamalulu atu lava i le Afioga i le Minisita o Tupe, e le i tali maia lata fesili lea. Na ala ona ou fesiligia le roll over ona e i ai faiga faavae. E moni e aumai le pule a le Ofisa Sili o Pulega o le Matagaluega o Tupe, a o le process, e ave tupe ia e toe vaai i ai le Matagaluega, tupe la ia ua le faaogaina, ona pule lea o latou i le toe faasoasoina mai, a le maua se Supplementary, e toe

faasau pea lea i le Tala o le Tupe Autu i le isi tausaga. E i ai mea e masani ona fai, mea ia o virements, o le toe fetuunaiga o tupe ia ua le faaaogaina e ave e faaaoga i nisi...

O le popolega lau Afioga, ona o le tele lava o mea ia e tutupu pea ona e naunau uma Matagaluega i tupe e faagaioi ai a latou galuega, a ua aafia ai la ma Matagaluega ia pe a le tapena lelei budget ma tulaga faapena, ona aafia ai lea o le tapenaga a le isi Matagaluega ona ua le lava le faasoa. A o lea e matau e ova tupe nei e le faaaogaina, e \$12 miliona, ua fai lava si tele tele o lenei aofaigatupe.

O lau fesili la lena i lau Afioga i le Minisita o Tupe, po o fai la, e sao e fai le roll over, ae faatino la i faiga faavae a le Malo, toe foi mai i le Palemene ni mea e toe faaaoga e toe vire i nisi galuega a isi Matagaluega ona aumai lea iinei i le Palemene. O le process la lena ona pasia lea. Ia ma le faaaloalo lava.

FOFOGA FETALAI: Ia, o lea ua maua le finagalo o lau Afioga foi o le Sui Taitaifono o le tatou Komiti o Tupe Maua ma Tupe Faaalu. E i ai le manatu e tatau lava ona lagolagosua foi la outou Komiti i le galuega a le Minisita ma le Matagaluega. Ia se i tulai mai lau Afioga i le Minisita pe a e fia tali i lea tulaga.

Afioga Hon MULIPOLA ANAROSA ALE MOLIOO: Ia, faafetai i lau Afioga i le Fofoga Fetalai, faafetai foi i le fesili ua tuuina mai. Ne i galo i le sui usufono o lea foi sa nofo i le Nofoa lea o le Minisita o Tupe. I lalo o le Vaega 8 Fuaiupu 55 ma le 56 o le Tulafono mo Pulega o Tupe a le Malo 2001, o lo o maioio mai ai, e mafai ona faavaeina e le Failautusi o Tupe ni faaputugatupe mo faamoemoega faapitoa, ma o nei faaputugatupe, e avea ma tupe faatulafonoina. O mea na o lo o i lalo o le vaega o le Tulafono lea, le tatou Public Finance Management Act, lea e i ai i totonu le tatou special purpose account, lea e mafai ona transfer i ai le tatou tupe ia e pei lava ona faailo atu i le amataga, o lea faatoa 9 masina. Matou te omai i totonu ia Setema lea na pasia ai le tatou Tala o le Tupe. O lona uiga, a le vave matou gaioi, e le mafai ona faamatu vaega uma ma faamanuiaga i le mamalu o le atunuu, aemaise o taimi faigata o lea o lo o feagai le tatou atunuu ma faamai ma luitau.

O le tulaga la lea e fesiligia pea e Tapunuu, ia po o le Afioga i le sui usufono, o le faamaninoga lena, o lea e i ai tatou vaegatupe ia, ua uma foi ona tuuina atu e Matagaluega taitasi i luma o le Kapeneta, ma ua i ai foi tatou FK ma pepa samasama ua maea ona approve ina. Ma o vaegatupe uma nei i lalo o le pili i le pasiaina o le tatou Tala o le Tupe 2021/2022, o lena e i ai i totonu tatou alagatupe ia. Peitai ane, ia ua vave ona maea le tatou paketi e le i faamatuina. O le auga lena o lea e i ai le tatou provision lea i lalo o le Public Finance Management Act le malosiaga o le tatou CEO a le Ministry

of Finance e mafai ai ona transfer agai le special purpose account. Ia, atonu ua malamalama lea...

FOFOGA FETALAI: Ia o lea ua manino lea tulaga. Ou te talitonu lau Afioga i le sui usufono mamalu o lea ua manino lelei le saunoaga a le Minisita. Ou te le o iloa la po o le a se isi mea o i tala atu o le saunoaga a le Minisita, o lau Afioga foi sa e saofai i o i le tulaga lea.

Afioga Hon Tapunuu Niko Lee Hang: Leai, e pei o le saunoaga lea a le Afioga i le Minisita faapea sa ou i o. E ese lava le taimi sa ou i ai i o ese mea na tutupu, e fou mea ia i lau faalogo. O le special account lea e saunoa i ai le Afioga i le Minisita, ou te le iloa pe relate agai le mea lea o le roll over lea ou te talanoa atu ai.

FOFOGA FETALAI: Ia, ou te talitonu lau Afioga i le sui usufono mamalu, o la e ua talanoa le Minisita i le Tulafono Autu. E tou te silafia foi e usitai uma lava process ma mea uma i le Tulafono Autu. Se i tulai mai lau Afioga i le Minisita o Faatoaga.

Susuga Hon Laauli Leuatea Polataivao Fosi: Ioe, sa nofonofu lava e tuu pea le avanoa e tali le Minisita o Tupe, a o lea ou te vaai atu lava e le o agai mai le finagalo o Tapunuu ma le Sui Taitai i le mea lea e faataavalevale atu. E le aumaia faiga faavae na tatou i ai i le Nofoaiga le la e fai ai le taimi lenei. O lea tatou te vevesi ona o tupe totoe, o le a le mea ua totoe ai tupe? O le a le mafuaaga ua ala ai ona totoe le \$19 miliona lea? Ua le mafai ona faagaoioi. Aisea? Luluti mea ia sa feagai ma tatou. E fai o le toso o le faigamalo i tatou finauga na fai, sau ma le misela, sau ma tulaga i le Koviti-19. O le mea lea, malilie sui usufono. Afai e fou i la outou faalogo, sala ina fou, leaga o faiga faavae fou na o lea na faataatitia e le faigamalo fou. Ae lafo maia le faatuatuga. It's a special account e i ai le pule a le Ofisa Sili o Pulega o Tupe a le Malo na te toe faasoaso ai. A e le i faia foi le isi tatou Supplementary, e le i oo atu i totonu ae toe sau i totonu. A o fuafuaga na, na ala ona totoe le tupe, ua toalia le taumafaiga o le Malo. Minisita o Faamasinoga, o lena e silafia toetiiti lava \$4 miliona, e oo i le Minisita o Aoga, e fia? Toetiiti lava \$4 miliona. Ia ma le toatele o isi Matagaluega a le Malo, o le mea lava lea e tasi. O lea e faamalulu atu ai pei foi o tatou finauga na fai, matou te le follow i faiga faavae a i ina. A matou tulai mai, e fai faiga faavae fou ina ia autafeloa le tatou faamoemoe. Ae malilie sui usufono e le toe aoga ona talanoa i faiga faavae faapea ua tea, ua sui le faigamalo, ua sui faiga faavae fou.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, pau lava lea o se mea e fia soso atu ai...

FOFOGA FETALAI: Ou te le iloa po o le a le isi mea e toe laa i ai lau Afioga i le Sui Taitai o lea ua manino.

Tofa Hon Laufo Fonotoe Nuafesili Pierre Laufo: Ioe, e leai se mea e toe... o le mea lea ou te toe faamanatu, o le mataupu lea na ou talanoa ai o mea o Tulafono. Tulafono a le Ofisa o le Okika, Suetusi Sili, Tulafono lea o le Appropriation Act. O Tulafono mea ia ou te talanoa atu ai. Faafetai.

FOFOGA FETALAI: Ia, e le o aia na Tulafono i le Tulafono lea.

Tofa Hon Laufo Fonotoe Nuafesili Pierre Laufo: Leaga o lea ua saunoa mai le Minisita o Faatoaga o le suiga o mea o faiga faavae.

FOFOGA FETALAI: O lea ua saunoa manino le Afioga i le Minisita o Tupe, o le Public Finance Management Act lea e faaaoga. O le mea lea, malilie ia, e eseese lava fuafuaga. Atonu o lea ua faataatitia tulaga e tataua ona i ai ina ia usitaia tatou Tulafono. O le mea lea, faaauau lau saunoaga lau Afioga i le Minisita o Tupe.

Afioga Hon Tapunuu Niko Lee Hang: Lau Afioga i le Fofoga Fetalai, ia ua ou malie o lea o le a ou nofo i lalo.

FOFOGA FETALAI: Faaauau lau saunoaga lau Afioga i le Minisita o Tupe.

Afioga Aliimalemanu Moti Momoemausu Alofa Tuuau: Lau Afioga i le Fofoga Fetalai, pe maua lava sina avanoa, leaga o au lea sa tele le taimi o le lauga sa fai i faiga faavae, lea sa tapenaina ai le Tala Faatatau o le Tupe, lea sa fai ai le faafetai i le Afioga i le Tamaitai Minisita faapea le Pulega a le Matagaluega o Tupe, ona o lea e sosolo lava i faiga faavae ia sa sau ai i le tele o tausaga ua tuanai, nai tamai mea lava e 2 lina na sui. Lea ua sui mai le 45% o vaegatupe e alu i totogi o le aufaigaluega, ia lea ua pau i le 35% ma se isi foi o pasene i le vaega lona 6. Ae ou te talitonu o lea ua tali manino le Afioga i le Tamaitai Minisita i le vaega tonu lea i le ave o tupe i i special accounts e toe faasafua ai, ae ou te manatu o le mea lea e lagalaga ai finagalo o mea tau accountants e patino lava ia matou nei ma le matou profession. Ae ou te iloaina e leai se isi o fesiligia le Failautusi o Tupe ma lana matafaioi lea, o le ave o tupe i totonu o le special accounts pe a uma le tausaga. Ae ou te iloa o le mea lea e laga atu o le tataua ona toe aumai atoa i le Tala Faatatau o le Tupe vaegatupe ia o le a toe faamatuu ina ia maua ai le aotelega atoa o tupe e alu i lea tausaga ma lea tausaga, ia avatu loa faatuualalo. Manuia le Fono.

FOFOGA FETALAI: Malo faafetai. Ia ou te talitonu lava o lea ua... o fautuaga o lea ua tuuina mai, ae lau Afioga i le Tamaitai Minisita, faaauau pea lau saunoaga i le tulaga o lena ua i ai le faatulagaga o tatou galuega.

Afioga Hon MULIPOLA ANAROSA ALE MOLIOO: Faafetai i lau Afioga i le Fofoga Fetalai, faafetai foi i finagalo ma manatu e fesoasoani foi i le tatou mataupu o lo o finauina pea i luma o le tatou Palemene. Atonu o lena foi ua uma ona avatu vaega uma o le tatou tulaga o le Tulafono o le Pulega o Tupe, ia, o lena e i ai le malosiaga lena e pei ona faailoaina atu.

Toe faaauau le faamatalaga i le tulaga lava o le taugata o le soifuaga. Atonu o se tasi lea o vaega o lo o agai i le taugata o le soifuaga, ona o le supply mai atunuu e agai mai ia Samoa ua mafua ai ona tele le tuutiitia po o le sioki foi o oloa faapea le suauu o lo o faatauina mai e Samoa, o lea ua siitia mauuluga ai le fua faatatau o le tau o oloa po o le inflation i Samoa, lea ua faamauiina i le 8.2% ia Me 2022 ae o lo o faamoemoe e oo atu lava i le 8.7% ia Iuni 2022. O lo o laugatasia foi ma le tau o le soifuaga i atunuu o lo o tatou faipaaga i fefaatauaiga, tatou major trading partners e pei o Niu Sila, e 5.1%, o Ausetalia, e 6.9% ma Amerika, e 8.5%.

Lau Afioga i le Fofoga Fetalai, e pei ona taua e nisi o sui usufono mamalu, o le tau lava o oloa auina mai fafo, o lo o aafia ai le tau o le soifuaga. Ma o le tali o nei luitau o le taumafai lava lea e uunai tatou atinae i totonu lava o Samoa aua le fofoga taumafa o le atunuu, aemaise ai ia lava ma totee meataumafa mo le mamalu o le atunuu.

Lau Afioga i le Fofoga Fetalai, i le masina foi o Aperila i le tausaga nei, sa pasia ai e le Kapeneta le faiga faavae mo faamalumaluga a le Malo, government guarantee policy. O le faiga faavae muamua lea ua tapenaina e le Malo, ona o lo o ave lava le faamuamua i aafiaga o faamalumaluga o i ai nei le Malo ma ana aitalafu. Aua a le lelei ona mataituina le gasologa ma le fuafuaina o faamalumaluga e tuuina atu i Faalapotopotoga a le Malo e talosagaina mai, e tele le aafiaga, ma oo ai i le tulaga e ono toe totogi ai e le Malo aitalafu nei a Faalapotopotoga.

O le faiga faavae fou a le Malo ua faataatitia atu ai vaega taua tetele nei. 1. Agavaa mo faamalumaluga a le Malo, eligibility criteria. 2. Tuutuuga ma aiaiga o faamalumaluga a le Malo. 3. Alafua ma taiala, procedures and guidelines for issuing government guarantee. 4. Faailoilo ma alafua mo le mataituina o faamalumaluga e tataua ona i lalo ifo o le 10% o le tamaoaiga.

5. O so o se faamalumaluga foi e faamaonia e le Kapeneta, e tataua ona Mulimulitai i alafua ma taiala ua faataatitia e le Malo. Mo le silafia, o le aofai o faamalumaluga a le Malo i le faaiuga o Mati 2022, e tusa ma le \$199.1 miliona, ma e faaititia lea i le \$14.2 miliona pe a faatusatusa atu i le \$213.3 miliona sa i ai i le faaiuga o Iuni 2021. O le aofaiga e tusa ma le 11% o le tamaoaiga, ma o le faamuamua foi ina ia tuutiitia faamalumaluga e itiiti ai foi aafiaga ma tupe totogi mo le Malo i le lumanai.

O le tatou vaalele o le Samoa Airways. E tele foi saunoaga ma fesili. Lau Afioga i le Fofoga Fetalai, atonu o lea e afio atu le afioga i le Minisita e ana le mataupu lea tau vaalele. Ae tau lava ina ou faapea atu, o le alofa lava ma le agalelei o le Atua i le faaiuga sa faatino e le Faigamalo, ina ia toe faafoi le vaalele. E le gafatia e le tatou Tala Tupe, faapea lo tatou atunuu, le gau o le tatou Faalapotopotoga o le Samoa Airways. Ma o le auina mai o le vaalele lisi lea, ua toe faafoi, e le foia ai le faafitauli.

Lau Afioga i le Fofoga Fetalai, sa fesiligia e nisi le tulaga o le Forensic Audit po o le a le uiga? Ae po o le a foi le eseesega o le Forensic Audit? ma le Financial Audit ma le Performance Audit? Ou te iloa o lo o silafia le uiga o nei ituaiga audit, ae faapuupu'u atu. O le Financial Audit, o le suesuega faasuetusi lea o tusi a se Faalapotopotoga po o se Kamupani e faamaonia ai, o lo o sao ma lelei. O le Performance Audit, e suesueina po o lelei ona faatino galuega a Kamupani, le Malo faapea Faalapotopotoga, i le tulaga e tatau ona i ai. O le Forensic Audit, o tomai faapitoa e aofia ai ma le tomai faasuesue, investigated. O lo o ou taulimaina le pepa o lo o i ai uma ia faamatalaga o audits nei pe a outou manaomia.

O le faatinoina o le Forensic Audit, ua maea ona pasiaina e le Palemene, ua maea ona faamaonia e le Kapeneta, le faasalalauina o lea galuega, mo se Kamupani suetusi faapitoa faava-o-Malo, e faatinoina, ona o lo o manaomia le tutoatasi o i latou o le a faatinoina lenei suesuega. O lea faatoa sui le Malo i le 40 tausaga, e alagata ai ona faatinoina se sailiga faapitoa o atinae sa faatinoina ae le i suia le Faigamalo. O lea faiga, ina ia mautinoa ai le sologa lelei o atinae mo le lumanai. O poloketi ua faamaonia ma filifilia, e faatino ai le suesuega faapitoa o le forensic, sa fua i taiala nei. (1) Tulaga o lo o i ai le atinae i le taimi lenei, ua tele tupe ua alu ai, ae le o mafai ona faaaogaina mo se manuia o se isi. (2) Tulaga o lo o aliae mai ai pea faalavelave, ona o le le lelei ona fausia o nei atinae. (3) Tulaga na faatatope ai le fausiaina o le atinae, o le tau o le galuega e tatau ona i ai, ma le tele o le tupe faaaluina, ma sa mafai ona sefeina pe ana fuafua lelei, ma faatino i le taimi e tatau ona faatino ai. (4) Aafia le atinae ua gau ma ua le mafai ona toe faaaauuina ona totogi ana aitalafu, ae sa mafai ona aloese mai nei faaiuga mai le amataga. (5) Aafia le atunuu, e ala i le maliliu o tagata ona o le lape o le faatinoina e le Malo o ona tiute. (6) Aafia le aseta ma ua le toe faaaogaina, write-off, ona o le le tausua lelei e i latou sa faamoemoeina, latou te tausua ma faapelepele e pei lava o ni a latou meatotino. (7) Faatinoina se fesoasoani a le Malo ma tufa ni tupe mo se faamoemoe a le Malo, ae le faavaea, pe ogatasi foi ma le tulafono le mafuaaga na tufaina ai ni tupe. Pe ua i ai foi se tulaga ua le paleni ai le tupe, e le o faaaogaina le galuega sa faatinoina.

Lau Afioga i le Fofoga Fetalai sa i ai se atugaluga i le tulaga o lo o i ai tane suauu i le uafu, ma le taina mai o le paipa i le talafatai o Apia, e pei ona saunoa ai foi le Sui Minisita o Vaisigano 1. Lau Afioga i le Fofoga Fetalai, i lana saunoaga faalauaitete na afea ai e le sui usufono le nofoaga o lo o i ai

tane suauu i uafu i Matautu. E faatasi ai ma le paipa lea o lo o tai i tafaala ane o Apia e agai atu i Sogi i le nofoaga o lo o i ai le PPS. Lau Afioga i le Fofoga Fetalai, o lenei aseta, sa fausiaina i le 2008 e sui ai le paipa tuai lea na ui mai i le sami. O lenei suiga sa faia ona o le tulaga le saogalemu ma matauina o le ui mai o le paipa i le sami faatasi ai ma le taugata o le tau vaavaaia. O le faataatiaina o lenei paipa i le laueleele sa faatinoina lea, ma le mataituina uma o tulaga mo le saogalemu, e aofia ai vaega nei. (1) O le faataatiaga o nei paipa sa faaaogaina ai taiala a le Malo o Ausetalia mo nei ituaiga galuega. (2) O lo o faaaogaina lenei paipa mo le tiso, penisini ma le karasini, ma e taatia lava le paipa i le tiso i taimi uma, aua o le tiso e faafaigata ona mumu se afi. (3) O lo o vaevaeina lenei paipa i ni vaega e tolu, ia mautinoa ai, afai e ono liki se paipa, e itiiti se suauu e ono maumau i totonu o le siosiomaga. E vaavaai ma mataituina lelei le utuina o tane i Sogi e le aufaigaluega a le PPS i taimi umi. Ma e oo mai i le aso, e leai lava se tulaga faaletonu ua tulai mai. O lenei paipa, o lo o ufi autafa i se vailaau e foia ai le ono elea. Ma o lo o siaki i tausaga uma. O lo o faatinoina asiasiga a inisia i taimi faatulagaina i nofoaga uma o lo o taatia ai lenei paipa, aua le faamautuina e le o aafia i ni atinae, ma ni galuega tetele ma o lo o malupuipua pea.

Lau Afioga i le Fofoga Fetalai, o le tulaga foi e pei ona fesiligia ai tane suauu. E faailoa atu ma le faaaloalo, o nei tane, ua leva ona i ai i le uafu. Na suia talu ai nei i le tausaga 2017, ona o tulaga le saogalemu na matauina i tane tuai. E le gata i lea, o le faaopoopo i ai o le isi tane e tolu ai tane suauu, o le taumafai lava lea ia lava le suauu, e tautuaina ai manaoga o le atunuu, i vaitau a o talia le oo mai o le vaa suauu. O nei tane na fausia i Matautu talu ai le le lava o eleele i Sogi.

Lau Afioga i le Fofoga Fetalai, o le fausiaina o nei tane, sa mulimulitai foi i taiala, o lo o faaaogaina i Ausetalia, ma sa vaavaaia e inisinia faapitoa mai i Ausetalia lava. E le gata i lea o nei tane na fausia, ia mama le ufi po o le tapuni o le tane, ae ia malosi autafa e faatatau lea, a tupu mai se faalavelave e pei o le mu lea na tulai mai i le 2016, ona lelea ese lea o le tapuni, ae o lo o malu pea i totonu o le tane le suauu ma le afi. Mo le silafia foi e le afioga i le Fofoga Fetalai ma sui usufono mamalu, o nei tane, e na o le tiso o lo o teu malu ai, e ma o le tiso o le suauu e aupitosili ona faigata ona mu. O lo o faatinoina asiasiga ma siaki masani a inisinia a le PPS ia nei tane i vaiaso uma, e faamautu ai le saogalemu o nei aseta. E faailoa atu foi, e talu mai le faalavelave i le tausaga e 2016, ua i ai nei oa faapitoa, o lo o teu lalata ane i nei tane, aua le faatamaia o se isi mu po o se afi e ono toe tulai mai.

Lau Afioga i le sui usufono, ia sa tele lava se suesuega i ia vaega uma, ona sa faatauaina e le tatou Matagaluega o Tupe le tulaga foi e pei ona e saunoaina ne i te i ua toe tulai mai. O lena ua faamatala auiliili atu ia le sailiiliga a le tatou Matagaluega o Tupe.

Popoe i le maualuga o le alafua, mo faasiliga o tupe alu i le tupe maua, e pei ona saunoa ai foi nisi o sui usufono. Lau Afioga i le Fofoga Fetalai, o lo o tuuina atu ni faamatalaga o fuafuaga mo tupe a le Malo. Lea na fautuaina ai le toe silasila i le alafua mo le faasiliga o tupe alu a le Malo. Lau Afioga i le Fofoga Fetalai ma sui usufono mamalu, e pei ona auina atu i faamatalaga o fuafuaga mo tupe a le Malo, o le tele o atunuu o le lalolagi, o lo o aafia pea ona o le Koviti-19, e ui i le tatala o tatou tuaoi faava-o-Malo. E mo le silafia o le tausaga nei, o lo o fuafuaina faasiliga o tupe alu nai lo tupe maua a Ausetalia, e tusa ma le 6.5%, o Niu Sila, e 5.7%, a o Amerika e 4.1%. O le tausaga fou 2022/2023, o lo o fuafuaina ai faasiliga o tupe alu nai lo tupe maua a le Malo o Ausetalia, e tusa ma le 3.5%, o Niu Sila e 0.2%, a o Amerika e 4%. O lona uiga lau Afioga, o lo o ogatasi lava fuafuaga ma alafua a le Malo, ma alafua o lo o faatino ai faiga faavae a Malo tetele a le lalolagi. Ma o le taofi, e leai lava se atunuu, e le o tele se faasiliga o ana tupe alu i tupe maua i lenei vaitau, a o galulue e toe fotuai, pe toe faamaite a tatou tamaoaiga. Na taua foi e nisi o sui usufono mamalu, ma fautuaina ai foi le Malo, e faatupe ma siitia tupe alu aua le uunaia o pisinisi, o polokalame ma atinae eseese, aua le faatupulaia o le tamaoaiga. Lau Afioga i le Fofoga Fetalai, o le mafuaaga tonu lava lea ua siitia ai lenei alafua ina ia mafai ona siitia tupe alu a le Malo e tului atu, ma sasaa atu i totonu o le tamaoaiga, aua le naunautaiga ia faamaite, ma faatupulaia atinae mo le manuia lautele o Samoa.

Tulaga i le ono aafia o aitalafu a le Malo ona o tulaga pagatia o lo o i ai nei le tamaoaiga ona o le siitia o le tau o le suauu, e pei ona fesiligia ai foi nisi o sui usufono. Lau Afioga i le Fofoga Fetalai, e pei ona folasia i totonu o faamatalaga o fuafuaga mo tupe a le Malo, o lo o tamau lava le Malo mo le tuutiitia pea ma le taofiofia o aitalafu a le Malo. O luitau foi o le tamaoaiga ua silafia, lea foi sa pau maualalo ai le tamaoaiga. Sa faamauina ia Tesema 2021, e \$1.86 piliona e tusa ai ma faamaumauga a le Ofisa o Faamaumauga. O lea pau o le tamaoaiga, e aafia ai le faailoilo ma le alafua, debts to GDP, ma siitia ai le pasene o aitalafu i le 52% o le tamaoaiga i le faaiuga o Mati, 2022.

Lau Afioga i le Fofoga Fetalai, e ui i le siitia i le 52% le ratio o aitalafu faatusa i le tamaoaiga, ae o lo o faaitiitia aitalafu mai le tausagas ua mavae. Mo le silafia, o le faaiuga o Mati 2022 sa faamauina ai le aitalafu tuufaatasi a le Malo i le \$951.3 miliona ua faaitiitia lea i le 5.1% pe \$50.9 miliona pe a faatusatusa ia Mati 2021. O lo o atagia ai le agai pea i lalo o aofai o aitalafu pe a faatusatusa atu i faamaumauga o tausaga ua mavae, sa faamauina lava i le piliona tala. O nei faamaumauga o lo o atagia ai foi fuafuaga o lo o faataatia atu i le fiscal strategy, o le Tala Faatatau Autu o le Tupe 2022/2023, e oo atu i le faaiuga o Iuni 2022 ua ono oo atu i le \$963 miliona le aofai o le aitalafu.

Lau Afioga i le Fofoga Fetalai, e taua lenei avanoa e faailoa atu ai foi nisi o fuafuaga ua maea ona pasia, ma faataatitia e le Malo, mo le mataituina o ana aitalafu ma faamalumaluga e tuuina atu i nonogatupe a ana Faalapotopotoga.

O le masina o Aperila i le tausaga nei, sa pasia ai e le Kapeneta le taiala mo le fuafuaina ma le pulea lelei o aitalafu a le Malo, 2021/2022 i le 2025/2026 medium term debt management strategy, 2022- 2026. O lenei taiala, sa tapenaina ma fuafuaina lava i le tulaga o lo o i ai le tatou tamaoaiga i le taimi lenei. O le aofaiga o aitalafu a le Malo o aafia o le Koviti-19, ma faalavelave tutupu faafuasei, e i ai foi le aafia o fesuiaiga o tupe mai fafo. E le o i ai se fuafuga a le Malo e toe faia nisi nonogatupe fou, mo le isi 3 i le 4 tausaga o lumanai, ae ave le faamuamua ina ia tuuitia aitalafu o lo o i ai nei. O le faamuamua ma le vaai mamao a le taiala, pe afai e manaomia le faatupeina e atinae ma Tala o le tupe, o lo o fautuaina ma faamamafa foi e le taiala vaega nei. (1) Faia na o nonogatupe e mama tuutuuga, e mama tului, e umi le taimi e totogi ai, highly concessional loans. (2) Ia faia foi na o nonogatupe manaomia mo le faatupeina o ni atinae e mautinoa e i ai ni penefiti po o ni tupe maua mai ai, pe a maea ona faatino, ina ia fesoasoani i le totogiina o nei nonogatupe, i le lumanai. O le borrowing strategy lena o lo o i le taiala, pe afai e manaomia ona faia ni nonogatupe fou. Ina ia mautinoa e maualalo le tului e totogi, e laititi tupe totogi i tausaga taitasi. Aua e umi le taimi e totogi ai, ma le faanaunautaiga ia tele le aoga o atinae e faatupeina e nonogatupe. O le taiala foi ma le fiscal strategy o lo o i ai faailoilo ma alafua, e fesoasoani ai i le mataituina o aitalafu a le Malo. (1) Ia i lalo ifo o le 50% o le tamaoaiga le aofaiga o aitalafu a le Malo. (2) O aofaiga o tupe totogi pe a fua i tupe maua lava ia e totonu o Samoa, e tataua ona ititi ifo i le 20%. E so o se nonogatupe fou foi e faia, ia mautinoa ia faia i tuutuuga mama, e pei e mama tului, ma umi se taimi e totogi ai. Lau Afioga i le Fofoga Fetalai, o le faamaite o le tamaoaiga lea e ave i ai le faamuamua a le Tala o le Tupe lenei, o lo o folasia i le Palemene, aua a siitia le tamaoaiga ma le soifua lelei o tagata, ua tele tupe maua e totogi ai aitalafu, tele avanoa e toe faia ai nonogatupe e totogi mama, mo atinae pe a manaomia i le lumanai. O atinae foi e faatupeina i nonogatupe e fuafua lelei, ma e tataua lava ona mautinoa vaega nei, ae le i commit le Malo i se isi nonogatupe. Ia i ai le cost benefit analysis e faamaonia ai, o lea atinae e manuia ai o tatou tagata. (2) Ia lelei lona faatinoina, ma e umi foi ona faaogaina e aunoa ma le toe aafia o le Tala o le Tupe a le Malo, e toe faaluina i le tausaiaina o lenei investment, po o aseta i tulaga tau sustainability, po o maintenance po o repairs ma isi uma costs e alu i le tausaiaina o nei atinae.

O le talosaga mo pasi a le Gagaemauga 2. Lau Afioga i le Fofoga Fetalai, ua faamauiina foi le atugaluga a le sui usufono o Gagaemaga 2, i le latou talosaga mo se pasi. Ma ua faailoa atu foi e le aufaigaluga a le Matagaluga o Tupe mo le faatalatalanoaina lea, o le amata faamatuuina atu, o ni pasi. E

pei e lilifa lava mo a tatou aoga faaitumalo, o e o lo o manaomia lenei aseta. Ae sosolo lava i tatou faiga faavae, o lo o i lalo o le Matagaluega o Tupe, le faamatuuina atu o tatou aseta.

Tofa Seuamuli Fasi Toma (Gagaemauga 2): Lau Afioga i le Fofoga Fetalai...

FOFOGA FETALAI: Ia malie lau Afioga i le Minisita se i tulai mai le sui usufono o Gagaemauga 2.

Tofa Seuamuli Fasi Toma: O lea ua oo le saunoaga a le Minisita o Tupe i le faamoemoe foi o lenei itumalo. O le vaiaso talu ai, e 2 aso e le i ai se pasi e alu atu i Patamea ma Samalaeulu. O le 2 foi lena o aso e le i aoga fanau a lea vaega o le itumalo. O le ala foi lea o le tulai atu, manu lea ua oo i ai le faasologa a lau Afioga. O le masina o Oketopa i le tausaga talu ai, sa avatu ai le talosaga a lenei itumalo mo se pasi. O lea foi o le a toe oo ia Oketopa, o lea foi ua tatalo atu i le agaga mauualalo i se pasi ona ua faaletonu auala e malaga ai le fanau e o atu i Patamea ma Samalaeulu mo le faatinoina o aoga a le fanau. Ma le faaaloalo faafetai.

FOFOGA FETALAI: Lau Afioga i le Minisita, masalo o la ua faafofoga mai le sui usufono mamalu i le ...e ao ona uia Faiga Faavae. Lau Afioga i le Minisita.

Susuga Hon MULIPOLA ANAROSA ALE MOLIOO: E faafetai i lau afioga i le Fofoga Fetalai. E mo le silafia e le Afioga i le sui usufono mo Gagaemauga 2, ou te taunuu mai i totonu o le Matagaluega o Tupe, e sefulu ma ona tupu ia tusi talosaga, mai tele o nuu ma itumalo, agai i tatou pasi lava ia. Aua e te popole se i maea ona pasi le Tala o le Tupe, ona ta talanoa lea, aua o lea foi ua faailoa foi i le Matagaluega o Tupe, ia a tatou faiga faavae, ina ia mafai ona faamatuu atu ai a tatou aseta ia, ne i te i ua maumau, ua leva ona tutu i Ululoloa.

Lau Afioga i le Fofoga Fetalai, na saunoa foi le sui usufono mai Sagaga 1, i le tulaga o lo o faapopoleina ai i le le ono auau o le faasoaa a le Malo, talu ai le faasiliga o tupe alu ma tupe maua, o lo o auina atu i le Laulau-a-Fono a le Palemene. Lau Afioga i le Fofoga Fetalai, e pei ona silafia, o le Tala o le Tupe o lo o auina atu, o lo o faaigoaina o Tala Faatatau, po o estimates. Ae o lona faatinoina o le a mataituina lelei ma le totoa e le Matagaluega o Tupe, ina ia mautinoa le faasoasoaina tatauina o alagatupe a le Malo. Aua le faatinoina o auunaga o lo o ave i ai le faamuamua, ma le soifua manuia o tagatanuu po o essential services a le Malo.

Lau Afioga i le Fofoga Fetalai, o le fesili a Safata 1, sa agai mai i le \$175 miliona tupe faasili ai tupe alu nai lo tupe maua. Ia sa toe tali lava e le sui

usufono lana fesili. O loo fuafuaina e pau tupe maua a le Malo ae siitia tupe faaalu. Ona o le taumafai lava lea, e toe uunai le tatou tamaoaiga e pei ona ou taua mafuaaga i se taimi ua sola. Mo le silafia foi o le tausaga faale-tupe lenei, ua toe faatulaga ai e le Ofisa o Tupe, le faataatiaga o tupe faameaalofa mai, e tuusao i le tatou budget a le Malo.

Lau Afioga i le Fofoga Fetalai, sa fesili le sui usufono mo Vaimauga 1 i le tau o le suauu. Atonu o lena ua maea ona ou faailoaina atu nisi o vaega ia, atonu e agai tonu le fesili a le sui usufono o Vaimauga i competition pe aumai nisi kamupani e fai se tauvaga, i le tulaga lava lea, i le tatou suauu. E faafetai i le manatu faaalua a le sui usufono. O le auina mai o le tatou suauu ma se faiga faatauvaga, o le a tagai i ai lo tatou Malo i le faiga o lo o i ai nei ma toe silasila totoa foi, po o i ai nisi tulaga, e mafai ona faaleleia ai lea tulaga.

Mataituina le tau leai o ni atinae tetele i le Tala o le Tupe. Lau Afioga i le Fofoga Fetalai ma sui usufono mamalu o le Maota. Ua taua i le saunoaga a le sui usufono mo Falealii 1, lana matau, i le tau leai lea o ni atinae tetele a le Malo mo le tausaga faale-tupe o lo o lumanai nei, 2022/2023. Aepeitai lau Afioga i le Fofoga Fetalai....

FOFOGA FETALAI: Ia malie lau afioga i le Minisita, tulai mai.

Afioga Sulamanaia Fetaiai Tauiiili Tuivasa: Ua alofa atu lava lenei itumalo i le tu a le Minisita, lea la se i fai ai sana malologa. O le agaga sa avatu ai le tuualalo a lenei itumalo, i le taugata o le soifuaga lea ua i ai i le suauu, penisini. Aua e po o le a lava le tulaga o tatou i ai, ae a leai loa suauu po o se penisini e utu ai lau taavale, o lona uiga ua savavali, pe faaaoga foi nisi mea aua le feoaiga i taavale. O le agaga lea sa avatu ai le tuualalo, ona o la e matau e tasi lava le kamupani lea latou te tufatufaina le suauu, po o le penisini iinei i si o tatou atunuu. O le tuualalo la lea na avatu e lenei itumalo, pe le mafai ona faatosina mai nisi kamupani, pe 2 pe 3, ina ia mafai ona fai faatauvaga, ina ia mafai ona alu ifo i lalo. Aua o le taimi lenei, o lea e \$3.98 i le kiso, tatou te matau la, o lona uiga o le masina fou, ua \$4 alu atu...e le mafai ona toe sau i lalo, e alualu ai lava i luga. E pei o le agaga lena, sa avatu ai le tuualalo i lau Afioga. E po o le a lenei tamaoaiga o lo o oi ai lo tatou atunuu, ae a taugata le tulaga o le penisini ma le kiso e utu ai le taavale, o lona uiga ua tatou vaai ua faaaoga manu aveavega ua feoai mai ai, se i tulou. Ona ua le mafai ona tatou feoai i taavale. E pei o le agaga lena sa tuuina atu ai le tuualalo i lau Afioga i le Minisita.

FOFOGA FETALAI: O la foi ua saunoa manino mai le Minisita, ua talia lelei lau fautuaga. Ua matua talia lelei e le Minisita mo le agai i luma. Aua laia e te popole, o la ua faamau lelei e le Minisita. Saunoa mai lau Afioga i le Minisita.

Susuga Hon MULIPOLA ANAROSA ALE MOLIOO: Faafetai lau Afioga i le Fofoga Fetalai, saolele le afioga i le sui usufono, e taua foi le tuualalo. A o le taimi lenei, e tasi le tatou kamupani o lo o nafa ma le sapalala mai o le tatou suauu iinei i Samoa. Ae i ai foi konekarate, o lona uiga e taua lou lagona ma le tuualalo, ia se i oo foi i le taimi e faamaea ai le konekarate, o se tasi lena o vaega o lo o iloilo pea e le tatou Matagaluega o le tupe. Ae le gata foi i lea, o le distributor o le tatou suauu ma le tatou penisini, e toatasi foi le kamupani a tatou o lo o i Samoa, o lo o faatinoina lea fuafuaga. Ma o nisi foi na o vaega o lo o tilotilo i ai le Matagaluega o Tupe, se i maea foi a latou konekarate, ona tilotilo po o a itu lelei, o a itu e mafai ona faamalieina uma vaega e pei ona saunoa ai foi le sui usufono. I le mataupu lava lea, i le nisi o saunoaga i le leai o ni atinae tetele i le Tala o le Tupe. Lau Afioga i le Fofoga Fetalai, a silasila i le itulau faa-Roma e 14 i le 20, o le tusi o le tatou Tala o le Tupe, o lo o lisi atu ai le tele o poloketi ma atinae. O le a galulue soosoo tauau ai le Malo ma ana paaga ma atinae masani mai fafo. O lo o atagia ai foi galuega e avea ai ma sui o le Malo i le Tala o le Tupe a le Matagaluega o Tupe, le tele o sao a le Malo i nisi nei o atinae tetele, e aofia ai le poloketi mo le siitia o tulaga mo le fausiaina o auala ma le poloketi o le atinaeina o malaevaalele ma aualatetele, lea o lo o faatupeina e le Faletupe o le lalolagi. O lo o i ai foi le poloketi mo le felauaiga i le laueleele lea o lo o aafia ai le auala mai Tanugamanono e tau i Siumu, po o le cross island road lea o lo o faatupeina o Faletupe mo Atinae a Asia, po o le ADB. O lo o faatupeina foi e le ADB le poloketi tele lea, o lo o fuafua e toe faalelei ai le uafu i Apia po o Matautu. E le gata i lea, o lo o faaauuina foi galuega i lalo o le GCF, lea o lo o toe fausiaina lelei ai le auala laupapa i Lelata, faatasi ai ma le toe puipui lelei, ma le faamalositia o fanua i autafa ane o le vaitafe o Vaisigano. O lo o i ai foi fuafuaga mo le fausiaina o se faleaoga fou mo le Iunivesite aoao, e faatupeina e Iapani. O lo o i ai foi nisi o faleaoga tulaga lua, o lo o fesoasoani mai ai Saina, i le toe faaleleia ma le fausiaina, e faatasi ai ma le faaauuina o le poloketi tele o le SAFPROM, lea o lo o lagolagoina e le Faletupe o le lalolagi ma le Faalapotopotoga o le IFAT. O nisi o saunoaga o se Tala o le tupe sili lea ona laititi i le matau, atonu o lea sa saunoa ai le sui usufono mai Satupaitea. Lau Afioga i le Fofoga Fetalai, na saunoa le sui usufono mamalu o le paketi pito sili ona laititi lenei, talu ona ia tulai mai.

Lau afioga i le Fofoga Fetalai ma sui usufono mamalu o le Palemene, o le aotelega o tupe faaalu e pei ona lauliliuina nei, e tusa ma le \$965 miliona. Ma e aofia ai tupe faaagaga mo polokalame o galuega faatino o le Matagaluega e tusa lea ma le \$726 miliona.

A silasila i Paketi ua tuanai, o lenei Tala o le Tupe, ua faamauiina ai se vaegatupe mo Polokalame a Matagaluega, ua pito sili ona maua i le Talafaasolopito o le Tala o Tupe a le Malo o Samoa. O le Tala o le Tupe o lo o faasolo nei, e \$983 miliona le aotelega, ae \$700 miliona mo galuega a

Matagaluega o le 2020/2021 e \$926 miliona le aotelega ae \$686 miliona mo galuega a Matagaluega, 2019/2020, e \$914 miliona, ae \$584 miliona mo Polokalame ma galuega faatino a Matagaluega ma faasolo atu ai lava.

O lona uiga, o lo o siitia ma ua faatupuluia vaegatupe ua mafai ona faamatuuina atu i le Tala Faatatau Autu o lo o i le Laulau-a-Fono a le Palemene a Samoa i le taimi leni o lo o i ai ia le tatou Tala o le Tupe aemaise lava i le ofi mai foi o le faigamalo, e tele lava foi se galuega sa faatinoina i le lotifale aemaise lava i le taumafai lava lea, e toe faatulaga le tatou Tala o le Tupe ma le faasoa o lo o i ai ina ia tali atu ai i faamuamua po o Budget Policies fou ua pasia ma ua tataua ona faatinoina loa. O se faataitaiga o le tatou \$51 miliona o lo o faatupe lava e lo tatou Malo mai i le tatou Tala o le Tupe.

O le faataatiaga lelei o alafua mo le mataituina o atinae ma polokalame o lo o faatupeina i le \$1 miliona a itumalo. E pei ona saunoa ai foi ia le sui usufono o Alataua Sisifo.

Lau afioga i le Fofoga Fetalai, e tusa ai ma le faafesili, ua tapena e le Malo se taiala ma alafua, mo le mataituina o le faaaogaina o le tai \$1 miliona mo atinae ma polokalame o le a faatinoina i itumalo taitasi. E le toe po malae i le vaegatupe e tai \$200,000 mai i le Tala o le Tupe 2021/2022, ua tuuina atu i itumalo taitasi aua le faamautuina o latou Komiti Faaitumalo. O teugatupe mo itumalo aemaise ai Ofisa o Itumalo, e aofia ai tagata faigaluega e toa 3, ma le faatotogaina i tulaga o meafale e manaomia.

O le sainia ai o maliliega ma itumalo mo le \$200,000 sa tuuina atu ai foi le taiala mo le faaoga tatauina o le vaegatupe amata, o lo o faagasolo le faatinoina o fonotaga uma mo Upolu ma Savaii, e faamalamalama lelei ai vaega uma e ao ona silafia mo le faaaogaina o le \$200,000 ma ua lafo atu i afioga i sui usufono o lo o Taitaifono i a latou Komiti Faaitumalo, e faamanino mataupu uma i a latou Komiti ma Itumalo.

Lau afioga i le Fofoga Fetalai, o le Tala Faatatau o le Tupe 2022/2023, ua faatulaga atu ai le tai \$1 miliona, mo itumalo e 51. O le faaaogaina o leni vaegatupe, e 15% o le a faagaga mo le faagaioiga o le Ofisa o le Itumalo, e aofia totogi o le afaigaluega, alauni i masina mo le Komiti Faaitumalo, ma Tupe Faaalu mo galuega fai a le Ofisa. O le isi 85%, o le a faagaga mo polokalame eseese a le itumalo, e fua lava i luga o lana Taiala, mo le atinae o le itumalo. E tapena lava e le itumalo, ae taimua ai le Komiti a le Itumalo.

E fautuaina foi Komiti a itumalo uma, e tapena nei Taiala mo le atinae o itumalo 5 tausaga, ina ia ogatasi ma le taiala o le atinae manuia o Samoa, PDS 2021, 2022, 2025, 2026 e pei ona i ai nei.

E pei ona faia e le \$200,000, o le a faatinoina foi Fonotaga ma itumalo, ma aoaoga mo Komiti ma ofisa o itumalo uma, i luga o ata mo le tapenaina o le taiala, mo le atinae o le itumalo, fuafuaga mo le faatinoina o galuega polokalame poo le work plan mo le Tala Faatatau o le Tupe o le tausaga faale-tupe, po o a tatou budget. O le a faamaopopo e le Matagaluega o Tina

ma Tamaitai ma Agafesootai ma fonotaga ma itumalo, ae lagolagosua malosi i ai le Matagaluega o Tupe, ma isi Matagaluega a le Malo. A maea ona tapena uma vaega ia a le itumalo ona tuuina mai lea, e iloiloia e le komiti mo atinae o le miliona, e pei ona pasia e le Kapeneta, ona faatoa sainia ai lea o le maliliega o le faamatuu atu o le \$1 miliona. O le a tuuina atu lenei maliliega faatasi ma le taiala i le faatinoina o lenei atinae taua a le Malo, ina ia limataitaina ai le faatinoina o galuega a le itumalo, ma le faaaogaina o le \$1 miliona, i totonu o le tausaga faale-tupe. O le a faamanino atu ai, e i ai le tatou program operating manual. O le a faamanino atu ai vaega uma e ao ona silafia e aofia ai le pulega lelei o le faaaogaina o tupe, metotia eseese mo le faatauina o oloa po o aseta, faataitaiga, ituaiga o aseta po o polokalame e mafai ona tuuina mai. E fua i luga o vaega uma ave i ai le faamuamua a le itumalo, faapea ai ma alafua mo le mataituina lelei o atinae ma polokalame faatino.

FOFOGA FETALAI: E talu ai o lea ua tatou taunuu i le tatou taimi e tolopo ai le tatou galuega, e tusa o le lafo sa faamaonia. O lea ou te faamalulu atu i lau Afioga i le Minisita, tatou talasoifua ia taeao i le alofa o le Atua, ona faaaauu ia lea o lau saunoaga. E pau lava lea o si mea laititi, lau Afioga Aliimalemanu i lau faafesili i le tulaga lea o le \$500,000 lea na taua e le Minisita o Tupe. O lo o i ai le vaegatupe i lalo o le Matagaluega o Tina ma Tamaitai e \$500,000 e fesoasoani mo Faalapotopotoga Tumaoti, silasila ane i le itulau 21 faa-Samoa, o lo o i ai i ina mo le silafia e lau Afioga i le sui usufono mamalu.

Ou te momoli atu le faafetai tele i le paia o le Palemene, malo le usufono, faafetai foi i le Malo mo saunoaga tali fuaitau e faamalamalama ai foi nisi o mataupu sa laga i saunoaga a le tatou Maota. Ua malo faafetai.

E fia momoli foi se faafetai i sootuli i Ofisa Sili o Pulega o Matagaluega ma Faalapotopotoga Tumaoti a lo tatou Malo, ia malo le onosai. Ia faafetai foi i lo outou lava papale.

Samoa i ou mamalu faaifo gata ua faamalo tapuai, faafetai tatalo. Ua manuia le faamoemoe o lau Palemene, ona o lau tailau i lenei aso. Tau ina ia malutia le soifua o lo tatou atunuu, i aao alofa o le Atua i faigamalologa o lenei po. Ae tatou te le i tolopo, e talosaga atu mo le sui usufono o Vaimauga 2, se i saunia se tatou tatalo e faaiu ai le tatou Fono.

Na tolopo Taualumaga a le Fono Aoaofaitulafono i le itula e 10:02 i le po seia aulia le Aso Lua, 28 Iuni 2022 i le itula e 9:30 i le taeao.